

駱丞集

附辨論  
攷異





叢書集成

初編

主編者  
王雲五

商務印書館發行



駱 丞 集

附辨譌攷異

駱賓王撰

本館據金華叢書  
本排印初編各叢  
書僅有此本

# 駱賓王文集序

（據石研齋重雕宋蜀本補）

魯國郟雲卿

駱賓王，婺州義烏人也。年七歲，能屬文。高宗朝，與盧照隣、楊炯、王勃文詞齊名，海內稱焉。號爲四傑，亦云。盧駱楊王四才子，仕至侍御史。後以天后卽位，頻貢章疏諷諫，因斯得罪，貶授臨海丞。文明中，與嗣業於廣陵共謀起義，兵事旣不捷，因致逃遁，遂致文集悉皆散失。後中宗朝降勅，搜訪賓王詩筆，令雲卿集焉。所載者卽當時之遺漏，凡十卷。此集並是家藏者，亦足傳諸好事。

唐書列傳

駱賓王，義烏人。七歲能賦詩。初爲道王府屬，嘗使自言所能。賓王不答。歷武功主簿。武后時，數上疏言事，下除臨海丞，鞅鞅不得志。棄官去。徐敬業亂，署賓王爲府屬，爲敬業傳檄天下，斥武后罪。后讀但嘻笑，致一杯之士未乾。六尺之孤安在。嬰然曰：誰爲之？或以賓王對。后曰：宰相安得失此人？敬業敗，賓王亡命。不知所之。中宗詔求其文，得數百篇。他日崔融與張說評勃等曰：勃文章宏放，非常人所及。炯、照隣可以企之。說曰：不然。盈川文如縣河，酌之不竭，優於盧而不減。王恥居後，信然。媿在前，濂也。開元中，說與徐堅論近世文章，說曰：李嶠、崔融、薛稷、宋之間之文，如良金美玉，無施不可。富嘉謨如孤峯絕岸，壁立萬仞。濃雲

鬱興震雷俱發。誠可畏也。若施於廊廟。駭矣。閻朝隱如麗服靚裝。燕歌趙舞。觀者忘疲。若類之風雅。則罪人矣。堅問今世柰何。說曰。韓休之文。如大羹元酒。有典則薄滋味。許景先如豐肌膩理。雖穠華可愛。而乏風骨。張九齡如輕縑素練。實濟時用。而窘邊幅。王翰如瓊梧玉笋。雖爛然可珍。而多玷缺。堅謂篤論云。

列傳舉

初秋於寶六郎宅宴序

六郎道合采葵。嘯懸鶉而契賞。諸君情諧伐木。仰登龍以緇歎。于時一葉驚寒。下陳柯而捲翠。百花凝照。淡虛牖以披紅。既而俱口得兔之情。共掩亡羊之淚。物我雙致。匪石席以言蘭。心口兩齊。混汗降而酌桂。雖忘筌戴笠。與交態於鸞臺。而擗管操觚。叶神心於勝氣。盍陳六義。詩賦一言。卽事凝毫。成者先唱云爾。

秋夜送閻五還潤州序

閻五官言返維桑。脩途指金陵之地。李六郎交深投漆。開筵浮白玉之樽。于時壁彩澄虛。漏輕光於雲葉。珪陰散迥。搖碎影於風梧。雖桂醕蘭缸。定淺留於一夕。而青山黃鶴。將惆悵於九秋。謂勒四言。俱申五際。

秋日餞尹大往京序

尹大官三冬懸暢。指蘭臺而拾青。薛六郎四海情深。飛桂樽而舉白。于時兔苑東上。龍火西流。劍彩沉波。碎楚蓮於秋水。金輝照岸。秀陶菊於寒隄。既切送歸之情。彌憫窮途之感。重以清江帶地。問吳會於星津。

白雲在天，望長安於日路。人之情也，能不悲乎。雖道術相望，叶神交於靈府。而風煙悲隔，貴申心於翰林。請振詞鋒，用開筆海。人爲四韻，用慰九秋。

秋日餞陸道士陳文林序

陸道士將遊西輔，通莊指浮氣之關。陳文林言返東吳，修途走落星之浦。於是維舟錦水，藉蘭若以開筵。綉騎金隄，泛榴花於祖道。于時赤煙沉節，青女司辰。霜雁啣蘆，舉賓行而使氣。寒蟬噪柳，帶涼亭以含情。加以山接太行，聳羊腸而飛蓋。河通少海，疏馬頰以開瀾。登高切送歸之情，臨水感逝川之嘆。旣而嗟別路之難駐，惜離樽之百傾。雖漆園筌蹄已忘，然於道術而維陽風雨。貴抒情於詠歌，各賦一言，同爲四韻。庶幾別後，用暢離憂云爾。

## 重刻駱丞集序

駱丞集前明有單行本。吾婺之義烏栢林子孫藏於祠。迨我朝乾隆年間。欽定全唐詩文。駱丞文三卷。詩三卷。均與焉。四庫全書目錄。曾採載之。稱四卷。道光初。義烏陳明府津。刻駱侍御集。註解甚晰。近爲兵燹所燬。板籍散亡。同治戊辰。余覓得江東孫公素本。不分卷數。其文亦缺而不全。祇載螢火與蕩子從軍二賦。暨靈泉一頌而已。詩則卽全唐集中所載也。己巳春。余哀輯金華文萃。將博採駱丞遺集。彙付手民。因取全唐文所載。爲齊州父老請陪封禪表。以及祭趙郎將諸作。共三十八篇。揆次鈔刊。合詩文爲四卷。俾成完璧。又因校對各本。頗有異同。另纂辨訛考異二卷。駱丞名殿四傑。與王楊盧三子爭長。而其才未及大用。武后惜之。以爲此宰相之過。中宗時。詔求其文。得數百篇。千百年來。半就散失。昔人謂嘗鼎一臠。便足知味。余嘗三復斯集。喟然於存者之少。而逸者之多也。抑又幸逸者雖多。而存者之猶復不少也。同治八年夏月。同郡後學胡鳳丹月樵甫謹序。



# 目錄

卷一

賦

螢火賦并序

蕩子從軍賦

頌

靈泉頌并序

表

自表至序文三十八篇  
均從全唐文錄出補入

爲齊州父老請陪封禪表

狀

自敘狀

策

對策文三道

書

上吏部裴侍郎書

與程將軍書

答員半千書

與博昌父老書

與親情書

與親情書

啓

上瑕邱韋明府啓

和學士閻情詩啓

上司刑太常伯啓

上李少常啓

上兗州刺史啓

上兗州崔長史啓

上兗州張司馬啓

上齊州張司馬啓

上廉使啓

上郭贊府啓

上梁明府啓

上吏部侍郎帝京篇啓

檄

代李敬業討武氏檄

露布

兵部奏姚州破逆賊諾沒弄楊虔柳露布

兵部奏姚州破賊設蒙儉等露布

序文

秋日於益州李長史宅宴序

冒雨尋菊序

晦日楚國寺宴序

餞宋三之豐城序

初夏邪嶺送益府竇參軍宴詩序

秋日餞麴錄事使西州序

贈李八騎曹詩序

揚州看競渡序

秋日與羣公宴序

聖泉詩序

釣磯應詰文

祭趙郎將文

卷二

五言古詩

夏日遊德州贈高四

詠懷古意上裴侍御

七言古詩

帝京篇

行軍軍中行路難

豔情代郭氏答盧照鄰

代女道士王靈妃贈道士李榮

卷三

五言律詩

在獄詠蟬并序

渡瓜步江

至分水戍

在江南贈宋五之問

疇昔篇

行路難

遊紫雲觀贈道士

途中有懷

望鄉夕泛

久客臨海有懷

遊竟部逢孔君自衛來欣然相送若舊

西京守歲

白雲抱幽石

春雲處處生

同辛簿簡仰酬思玄上人林泉四首

秋日送陳文林陸道士

送鄭少府入滄

送費六還蜀

秋日送侯四

秋日送尹大赴京

秋夜送闕五

送王明府上京參選

秋日送別

別李嶠

在竟州餞宋五之間

遊靈公觀

夏日遊山家同夏少府

初秋登王司馬樓宴

初秋於竇六郎宅宴

冬日宴

饒雞子

詠雲酒

詠美人在天津橋

憲臺出紮寒夜有懷

送郭少府

餞略四二首

冬日過故人任處士書齋

塵灰

秋晨同淄川毛司馬秋色九詠

秋風

秋雲

秋蟬

秋露

秋月

秋水

秋螢

秋菊

秋鴈

詠水

詠鴈

詠雪

王昭君

樂大夫挽詞五首

丹陽刺史挽詞三首

送劉少府遊越州

從軍行

稱心寺

陪潤州薛司空丹徒桂明府遊招隱寺

出石門

北眺春陵

同崔駙馬曉初登樓思京

月夜有懷簡諸同病

送宋五之問得涼字

卷四

五言排律

浮槎井序

晚度天山有懷京邑

晚泊蒲類津

遠使海曲春夜多懷

過張平子墓

邊城落日

至分陝

夏日遊目聊作

春夜韋明府宅宴

春霽早行

晚泊河曲

早發淮口望盱眙

早發諸暨

海曲書情

蓬萊鎮

宿溫城望軍營

和孫長史秋日臥病

四月八日題七級

早秋出塞寄東臺詳政學士

鄭安陽入蜀

在軍中贈先還知己

和李明府

望月有所思

送吳七遊蜀

西行別東臺詳政學士

春晚從李長史遊開道林故山

和王記室從趙王春日遊陀山寺

冬日野望

夕次舊吳

過故宋

秋日山行簡梁大官

晚泊江鎮

晚渡黃河

晚憇田家

宿山莊

夏日憶張二

寓居洛濱對雪憶謝二



叙寄員半千

靈隱寺

寒夜獨坐遊子多懷簡知己

傷祝阿王明府

詠懷

邊夜有懷

久戍邊城有懷京邑

幽繫書情通簡知己

棹歌行

五言絕句

在軍登城樓

臨易水送人

送別

詠照鏡

挑燈杖

詠塵

翫初月

七言絕句

憶蜀地佳人

雜言

詠鵝

# 駱丞集卷一

唐 駱賓王撰

## 賦

螢火賦并序

余猥以明時久遭幽紮見一葉之已落知四運之將終悽然客之爲心乎悲哉秋之爲氣也光陰無幾時事如何大塊是勞生之機小智非周身之務嗟乎緜袍非舊白首如新誰明公治之非孰辨臧倉之愬是用中宵而作達旦不暝覩茲流螢之自明哀此覆盆之難照夫類同而心異者龍蹲歸而宋樹伐質殊而聲合者魚形出而吳石鳴苟有會於精靈夫何患於異類況乘時而變含氣而生雖造化之不殊亦昆蟲之一物應節不慙信也與物不競仁也逢昏不昧智也避日不明義也臨危不懼勇也事有恣情而動興因物而多懷感而賦之聊以自廣云耳

伊元功之播氣有丹鳥之賦象順陰陽而亭毒資變化而含養每寒潛而暑至若知來而藏往既發揮以外融亦含光而內朗若夫小暑南收大火西流林塘改夏雲物迎秋忽凌虛而赴遠乍排叢而出幽均火齊之宵映如夜光之暗投逝將歸而未返忽欲去而中留入槐榆而燄發若改燧而環周繞堂皇而影泛

疑乘燭以嬉遊。點綴懸珠之網。隱映落星之樓。乍滅乍興。或聚或散。居無定所。習無常翫。曳影周流。飄光  
凌亂。泛豔乎池沼。徘徊乎林岸。狀火井之沉熒。似明星之出漢。值衝飈而不烈。逢淫雨而逾煥。炤灼兮若  
滿虛之夜飛。的爍兮像招搖之夕爛。與庭燎而相炫。然重陰於已昏。共燭火而齊息。避太陽於始旦。爾其  
光不周物。明足自資。偶仙鼠而伺夜。對飛蛾之赴燭。類君子之有道。入暗室而不欺。同至人之無迹。懷明  
義以應時。處幽不昧。居照斯晦。隨隱顯而動息。候昏明以進退。委性命兮幽玄。任物理兮推遷。化腐木而  
含彩。集枯草而藏煙。不貪熱而苟進。每和光而曲全。豈如鎔金而自鑠。寧學膏火之相煎。陋蟬蚓之習蛻。  
怵螻蟻之慕羶。匪傷蜉蝣之夕。不羨龜鶴之年。捨榆飛而控地。搏扶起而垂天。雖小大之殊品。豈逍遙之  
異筌。夫何化之斯化。無使然而自然。若乃有來斯通。無往不至。排朱門而獨遠。昇青雲而自致。匪偷光於  
鄰壁。寧假輝於陽燧。終徇己以效能。靡因人而成事。物有感而情動。迹或均而心異。響必應之於同聲。道  
固從之於同類。始未明於趨捨。庸詎識其旨意。子惠不知魚之爲樂。吾又安能知螢之爲利。高明兮有融  
濃變兮無窮。牛哀條而化虎。羽泉忽兮生熊。血三年而藏碧。魂一變而成虹。知戰場之有鱗。晤冤獄之爲  
蟲。彼翺飛之弱質。尙矯翼而凌空。何微生之多躡。獨宛頸以觸籠。異壁光之照廡。同劍影之埋豐。凱道迷  
而可復。庶幽鑿而或通。覽光華而自照。顧形影以相弔。感秋夕以殷憂。歎宵行以熠燿。熠燿飛兮絕復連。  
殷憂積兮明且煎。見流光之不息。怕驚魂之屢遷。如過隙兮已矣。同奔電兮忽焉。儻餘光之可照。庶寒灰

之重然。

蕩子從軍賦

李空同謂此不類賦體當作歌行爲是觀者詳之

胡兵十萬起妖氛。漢騎三千掃雲陣。隱隱地中鳴戰鼓。迢迢天上出將軍。邊沙遠離風塵氣。塞草長萎霜露文。蕩子辛苦十年行。回首關山萬里情。遠天橫劍氣。邊地聚笳聲。鐵騎朝常警。銅焦夜不鳴。抗左賢而列陣。屯右校以疏營。滄波積凍。連蒲海。雨雪凝寒。遍柳城。若乃地分玄微。路指青波。邊城暖氣。從來少。關塞元雲。本自多。嚴風凜凜。將軍樹。苦霧蒼蒼。太史河。旣拔距以從軍。且揚麾而挑戰。征旆凌沙漠。戎衣犯霜霰。樓船一舉。爭沸騰。烽火四連。相隱見。戈文耿耿。懸落星。馬足駉駉。擁飛電。終取俊而先鳴。豈論功而後殿。征夫行樂。踐榆溪。倡婦銜怨。坐空閨。離蕪舊曲。終難贈。芍藥新詩。豈易題。池前快對。鴛鴦伴。庭際羞看。桃李蹊。花有情而獨笑。鳥無事而恒啼。蕩子別來。年月久。賤妾空閨。更難守。鳳凰樓上。罷吹簫。鸚鵡杯中。休勸酒。聞道書來。一鴈飛。此時絨怨。下鳴機。裁鴛帖。夜被薰。麝染春衣。屏風宛轉。蓮花帳。窗月玲瓏。翡翠帷。箇日新粧。始復罷。祇應含笑待君歸。

靈泉頌井序

聞夫玄功幽贊。靈心以有德是親。至道冥符。篤行以通神爲本。若乃天經地義。色養叶於因心。夏清冬溫。愛敬弘於錫類。下建六幽之奧。上洞三光之精。不有至誠。孰云斯感。有廣平宋思禮。字過庭。皇朝永州刺

史防之嫡孫。戶部員外順之長子。伶丁偏露。早喪慈親。永懷鞠養之恩。長增思慕之痛。弱不好弄。長而能賢。趨庭聞詩禮之風。永宗勗曾閔之行。事後母徐。以至孝聞。北面興悲。泣高堂而咎己。東遊下位。干微祿以逮親。調露二年。來佐百里。俯就微班之列。將申返哺之情。苟立身其若斯。於從政乎何有。時歲亢旱。金石行銷。遠近川原。殆將堙絕。濬井皆爲湯谷。通波盡化污池。太夫人在遲暮之年。有溫勞之疾。非濫漿不可以適口。非源泉不可以蠲痼。色養旣虧。憂惶靡訴。俄而廳階之下。忽有清泉自生。因疏導其源。遂流注不竭。味甘若醴。氣冷如冰。此邑城控剡山。地連禹穴。基址多石。岡阜無津。爰自興建以來。久微穿汲之利。非精誠貫於有道。純志浹於無私。孰能洽冥。既以通幽。導靈泉而致養者也。昔漢臣忠烈。窮井飛於一言。姜婦孝思。潛波移於七里。靜惟陳迹。彼亦何人。蕭縣尉柳冕。耿介之士也。道合則金蘭若膠漆。清異則軒冕猶埃塵。片善可嘉。朝聞甘於夕死。一諾猶重。黃金賤於白圭。以爲執友。素交豈輕。肥利祿之謂也。賞音達禮。寧鐘鼓玉帛之云乎。所恥者歿而無稱。所貴者存乎不朽。徒懷美志。未遇良材。某出贊荒隅。途經勝壤。三秋客恨。長懷宋玉之悲。一面交歡。整雪桓譚之涕。觀斯水之清泚。感若人之精誠。見賢思齊。仰珪璋而有地。揮毫興頌。鏤琬玉以無慙。乃作頌曰。

粵若稽古。厥初生民。其誰不孝。獨我難倫。義不悖道。仁不遺親。愛敬盡力。孝悌通神。願我罔極。因心感至。冥契動天。甘泉湧地。冷冷無竭。蒸蒸不置。曾是我思。永錫爾類。爰有勞人。景行芳塵。事諧則感。道洽斯親。

孝爲禮主，名爲實賓。儻斯文之不墜，知盛德之有鄰。

補遺。從全唐文錄出。

爲齊州父老請陪封禪表

臣聞元天列象，紫宮通北極之尊。大帝凝圖，宏猷暢東巡之禮。是知道隆光宅，旣輯玉於雲臺。業紹禋宗，必塗金於日觀。陛下乘乾握紀，纂三統之重光。御辯登樞，應千齡之累聖。故得河浮五老，啓赤文於帝期。海薦四神，奉丹書於王會。瑞開三脊，祥治五雲。旣而輯總章之舊文，紹辟雍之故事。非烟翼馭，移玉輦於梁陰。若月乘輪，祕金繩於岱嶽。臣等職均芻狗，陰謝桑榆。幸屬堯鏡多輝，照餘光於連石。軒圖光耀，追盛禮於樞金。然而鄒魯舊邦，臨淄遺俗。俱沐二周之化，咸稱一變之風。境接青疇，俯瞰獲麟之野。山開翠屺，斜連辨馬之峯。豈可使稷山遺氓，頓隔陪封之禮。淹中故老，獨奉告成之儀。是用就日披丹，仰璧輪之三舍。望雲抒素，叫天關於九重。儻允微誠，許陪大禮。則夢瓊餘息，仰仙闕以交權。就木殘魂，遊岱宗而載躍。

自敘狀

伏奉恩旨，令通狀。自敘所能。某本江東布衣也。幸屬大鑑貞觀，合璧光輝。易彼上農，叨茲下秩。於今三年矣。然而進不能談社稷之務，立事實中。退不能壻丞相之門，買名天下。徒以黃離元吉，白賁幽貞。沐少海之波瀾，照重光之麗景。雖任能尙齒，載宏進善之規。而觀過知人，異降自媒之旨。是用披誠瀝懇，以抒愚

衷若乃忘大易之謙光。矜小人之醜行。彈冠入仕。解褐登朝。飾懷祿之心。效當年之用。莫不徇名養素。勵朽磨鉛。自謂身負管樂之資。志懷周召之業。若斯人者。可勝道哉。而修譽察能。聽言觀行。捨真筌而擇十。沿虛談以取才。將恐有其語而無其人。得其資而喪其實。故曰。知人不易。人不易知。抑又聞之。知臣莫若君。知子莫若父。誠能簡材試劇。考績求功。觀其所由。察其所以。臨大節而不可奪。處至公而不可干。冀斯言之無虧。於從政乎何有。若乃脂韋其迹。乾沒其心。說己之長。言身之善。靦容冒進。貪祿要君。上以素國。家之大猷。下以瀆狷介之高節。此凶人以為恥。況吉士之為榮乎。所以令銜其能。斯不奉令謹狀。

對策文三道

問。岱岳遊魂。人佳城而怛化。瀛洲羽客。竦鶴轡而輕舉。雖則備於縑素。昭晰可觀。求諸耳目。虛無罕驗。乘杖成龍。有異虞翻之旨。銜恩結草。寧符宗岱之言。二者何從。爾其揚摧。

對。遐觀素論。眇覲元風。惟鬼惟仙。難究難測。至夫滕公長往。佳城開白日之微。洪崖不歸。層邱控紫雲之蓋。或崇成蒼狗。自是趙王之神。道叶赤龍。爰通陸安之治。玉壘變葦宏之血。金闕化浮邱之靈。固能目觀桑田。來作西王之使。魂遊蒿里。還為北帝之臣。然而將聖生鄒。本忘情於語怪。多材封魯。亦默論於通仙。泊乎大義既乖。斯文將墜。於是八儒三墨之道。異軫分馳。九流百家之文。殊途競爽。語仙則有無交戰。語鬼則虛實相紛。遂使結草抗軍。爰乖宗岱之論。化竹游水。有異虞翻之言。然而博訪古詩。緬尋曩冊。徇甘

浮說徒有奔競之談。求諸至言。抑匪通經之旨。何則。高明瞰室。已著六爻之文。太虛游形。式編三洞之錄。故齊君出獵。遇豕啼於貝邱。周嗣登仙。游鶴軒於洛浦。況乎干寶碩德。已輯搜神之書。劉向通儒。非無列仙之傳。斯皆實錄。諒匪虛談。謹對。

問。士農工商。四民各業。廢一不可。取譬五材。而闕里致言。鄙於學稼。漆園起論。爰稱絕機。豈先聖垂文。義有優劣。將隨方設教。理或變通者哉。汝其矢陳。用啓前惑。

對。出震登皇。垂衣裳而馭籙。乘乾踐帝。順舒慘而字氓。莫不列九土以開疆。因四人而安業。故農爲政本。兩漢舉力田之勤。財用聚人。九市列惟金之利。陟龍門而就日。入仕彈冠。斷蟬翼以成風。追工運斧。咸用因人成事。隨利濟時。蓋五帝通規。三王茂範。然則泣麟上聖。訓三千以領徒。夢蝶幽人。搏九萬以齊物。欲使邱門志學。折以問農之言。漢渚絕機。抒以灌園之巧。斯乃變通權數。趨舍適宜。當今海內乂安。天下樂業。士食舊德。農服先疇。自可孫宏獻書。以待公車之制。王丹載酒。時慰田家之勞。謹對。

問。四十強仕。七十懸車。著在格言。存諸甲令。然則顏驥韞價。殆乎白首。和曾播美。始自齠年。欲使滋泉之彥。必臻洛陽之才。無捨則隄防。或爽襟帶。徒施其道如何。佇聞嘉答。

對。竊聞大人有作。義佇良材。貞士徇名。理資明主。是知君必待士。士必待君。故使飛龍在天。聖智有賢明之佐。巨魚縱壑。元后得唐虞之臣。然則否泰或爽。材運難并。歲漸懸車。尙牧淄原之豕。年甫志學。且珥漢



庭之貂。是知因藉時來。和君播元。齟之俊。當其未遇。顏生致白首之勤。語其古今。稽之運會。雖則人事。抑亦天時。當今乘六御天。得一居帝。翹車獵彥。東帛旌賢。故叢桂幽人。罷輜真於文豹。青蓮江使。自裂兆於非熊。豈止洛陽之才。來儀漢國。滋泉之叟。降止周朝而已哉。某談乏二龍。識迷三豕。徒以鑽木。輕焰。仰昇扶而耀輝。化草餘光。對含桂而炫彩。迴皇如失。俯仰多慙。謹對。

上吏部裴侍郎書

四月一日。武功縣主簿駱賓王。謹再拜奉書吏部侍郎裴公執事。易曰。書不盡言。言不盡意。然則理存乎象。非書無以達其微。詞隱乎情。非言無以筌其旨。僕誠鄙人也。頗覽前事。每讀古書。高堂九仞。曾參負北向之悲。積粟萬鍾。季路起南遊之嘆。未嘗不廢書輟卷。流涕沾襟。何則。情蓄於中。事符則感。形潛於內。迹應斯通。是用布腹心。瀝肝膽。庶大雅含宏之量。矜小人惻款之誠。惟君侯察焉。賓王一藝罕稱。十年不調。進寡金張之拔。退無毛薛之游。亦何嘗獻策干時。高談王霸。銜才揚己。歷詆公卿。不汲汲於榮名。不戚戚於卑位。蓋養親之故也。豈謀身之道哉。不圖君侯忽垂過聽之恩。任以書記之事。儼人則多慚。阮瑀入幕。則高謝鄒超。昔鼎政荆軻。刺客之流也。田光豫讓。烈士之分也。咸以勢利相傾。意氣相許。尙且捐軀燕趙。甘死秦韓。今君侯無求於下官。見接以國士。正當陪麾後殿。奉節前驅。賈餘勇以求榮。效輕生而答施。而顧遂巡於成命。躊躇於從事者。徒以夙遭不造。幼丁閔凶。老母在堂。常嬰羸恙。藜藿無甘旨之膳。松楸闕

遷厝之資。撫躬存亡。何心天地。故寢食夢想。噬指之戀。徒深。歲時烝嘗。崩心之痛。罔極。若僕者。固名教中一罪人耳。何面目以奉三軍之士乎。況屬天倫之喪。奄踰七月。遠膝下之養。忽以三年。而凶服之制。行終。哀疚之情。未洩。興言永慕。舉目增傷。夫怨於心者。哀聲可以應木石。感於情者。至性可以通神明。故徐元直指心以求辭。李令伯陳情以窮訴。上以乘輿王之佐命。下以全奉親之篤誠。而蜀主不以為非。晉君待之愈厚。此二人者。豈貪貧賤。惡榮華。厭萬乘之交。甘匹夫之辱也。蓋有不得已者哉。人有乾沒為心。脂韋成性。捨慈親之色養。許明主以驅馳。內忘顧復之私。外存傳會之眷。薄骨肉。厚榮寵。苟背恩而自效。則君侯何以處之。且義士期乎貞夫。忠臣出乎孝子。既不能推心以奉母。亦安能死節以事人。雖物議之無嫌。實吾斯之未信也。況流沙一去。絕塞千里。子迷入塞之魂。母切倚闕之望。就令觀以卒歲。仰南薰之不費。而使憂能傷人。迫西山而何幾。君侯情深錫類。道叶天經。明恕待人。慈心應物。儻矜犬馬之微願。憫烏鳥之私情。寬其負恩。遂其終養。則窮魂有望。老母知歸。竇王死罪再拜。

與程將軍書

昨見武郎將。備陳將軍之言。恩出非常。談過其實。恭聞嘉惠。深用慚惶。君侯懷管樂之才。當衛霍之任。豐功厚利。盛德在人。送往事居。元勳蓋俗。智足以興王業。道足以濟蒼生。尚且屈公侯之尊。伸筦庫之士。若下僕者。天地一無用芻狗耳。粵自旌賁之辰。卽逢聖明之歷。材不經務。不能成佐命之功。智不通時。不能

包周身之慮。加以天資木強。不能屈節權門。地隔蓬心。不能買名時議。常願爲仁由己。喪我於吾。見機可。以絕機。無用之爲有用。隨時任其舒卷。與物同其波流者矣。其於木也。魯班無所措其鈎繩。其於駕也。伯樂無所施其銜策。不悟聖朝發明揚之詔。君侯緝雍熙之道。曲垂提獎。廣借游揚。猥以樗櫟之姿。忝預賢良之薦。當今鴻都富學。麟閣多英。非游夏不可以升堂。非夔牙不可以擊節。倘片言失德。事暴區中。匹夫竊議。語流天下。進乖得賢之舉。退貽薄德之譏。恐不肖之軀。爲高明之累耳。必能一盼增價。九術先登。燕昭爲市駿之資。郭隗居禮賢之始。則當效駑駘之用。飾固陋之心。陶鑄堯舜之典謨。憲章文武之道德。上以究三才之能事。下以通萬物之幽情。將使詞翰爲行己外篇。文章是立身岐路耳。又何足道哉。言而不慚者。恃惠子之知我也。所恨禁門清切。造別無緣。官守牽纏。程期有限。某尙期辭滿。倘泛孤舟。萬里煙波。舉目有江河之限。百齡心事。勞生無晷刻之歡。嗟乎。流水不窮。浮雲自遠。露襟此別。把袂何時。恃以平生之私。忘其貴賤之禮。幸勿爲過。謹不多談。

答員半千書

張評事至。辱惠書及詩。把翫無厭。整如有絃。上言離恨。下勸交情。篤以猛風乾蘇之談。彌以驟雨濕薪之喻。雖聞義則徒。道存於起予。而擬人失倫。事均乎玩物。借如誠說。蓋足下之不知言。倘或劇談。豈吾人之所仰望。夫鯤之爲魚也。潛碧海。泳滄流。沈總於勃海之中。掉尾乎風濤之下。而濠魚非鮒。自以爲可得而

齊焉。鵬之爲鳥也。刷毛羽。恣飲啄。戢翼於天地之間。宛頸乎江海之畔。而雙鳧乘雁。自以爲可得而襲焉。及其化羽垂天。搏風九萬。振鱗橫海。擊水三千。寧肯借翰於搶榆。假力於在藻。資江濱涓流之水。待堀堞揚塵之風哉。故張子房之達人也。擊水搏風之適焉。朱買臣之屈己也。戢翼沈鯉之致焉。足下雅得古人之致。不乏先賢之遇。自守莊筌。無嬰魏網。亦寧不知在藻搶榆之力。非擊水搏風之助哉。而詞旨殷勤。深所未諭。盍言爾志。豈若是乎。夫人生百年。物理千變。名利寵辱之形立矣。愛憎毀譽之迹生焉。其有道在則尊。德成而上。幽貞爲虛白之室。靜默爲太元之門。知軒冕是儻來。悟榮華非力致。苟斯道之不墜。亦何患乎無成。而欲圖僥倖於權重之交。養聲譽於衆多之口。所以楊朱徘徊於岐路。阮籍怵惕於窮途。嗟乎。霜往露來。歲寒不待。山高河廣。離會無時。桂樹寒花。公子去而忘返。松巖春草。王孫遊以不歸。去矣員生。遠離隔矣。音塵不嗣。情其勞矣。畏途窮谷。靜躁殊矣。惠而好我。無密爾音。

與博昌父老書

月日賂賓王。致書於博昌父老等。承並無恙。幸甚幸甚。雲雨俄別。封壤異鄉。春渚青山。載勞延想。秋天白露。幾變光陰。古人云。別易會難。不其然也。自解攜襟袖。一十五年。交臂存亡。略無半在。張學士溘從朝露。辟閭公倏掩夜臺。故吏門人。多遊蒿里。昔年宿德。但見松邱。嗚乎。泉壤殊途。幽明永隔。人理危促。天道奚言。感今懷舊。不覺涕之無從也。過隙不留。藏舟難固。追維逝者。浮生幾何。哀緣物興。事因情感。雖蒙莊一

指。殆先覺於勞生。秦佚三號。詎忘情於怛化。啜其泣矣。尙何云哉。又聞移縣就樂安故城。廨宇邑居。咸徒其地。里開阡陌。徒有其名。荒徑三秋。蔓草滋於舊館。頽墉四望。拱木多於故人。嗟乎。仙鶴來歸。遼東之城。郭猶是。靈烏代謝。漢南之陵谷已非。昔吾先君。出宰斯邑。清芬雖遠。遺愛猶存。延首城池。何心天地。雖則山河四塞。是稱無棣之墟。松檟千秋。有切惟桑之里。故每懷夙昔。尙想經過。于役不遑。願言徒擁。今西成有歲。東戶無爲。野老清談。怡然自得。田家濁酒。樂以忘憂。故可洽賞當年。相歡卒歲。寧復惠存舊好。追思昔游。所恨企予望之。經途密邇。佇中衢而空軫。巾下澤而莫因。風月虛心。形留神送。山川在目。室邇人遐。以此懷勞。增其嘆息。情不遺舊。書何盡言。

與親情書

風壤一殊。山河萬里。或平生未展。或睽索累年。存沒寂寥。吉凶阻絕。無由聚洩。每積淒涼。近緣之官。佐任海曲。便還故里。冀敘宗盟。徒有所懷。未畢斯願。不意遠勞折簡。辱逮堙淪。雖未敘言。暫如披面。晚夏炎鬱。並想履宜。賓王疾患。忽無況耳。

與親情書

某初至鄉閭。言尋舊友。耆年者化爲異物。少壯者咸爲老翁。山川不改舊時。邱隴多爲陳迹。感今懷古。撫存悼亡。不覺涕之無從也。詢問子姪。彼亦凋零。永言傷情。增以悲慟。雖死生之分。同盡此途。而存亡之情。

豈能無恨。終朝展接。以申闕懷。取此月二十日。栖桐成禮。事過之后。始得可行。祇敍尙賒。仰繫何極。各願珍勛。遠無所詮。

上瑕邱韋明府啓

賓王啓。側聞戢翮觸籠。負垂天而跼影。伏櫪羈蹄。望絕塵而踈足。故以遊蓮遇綬。悟宋玉於嬰羅。在藻迷波。顧蒙莊於煦轍。是以臨淄遣婦。寄束縑於齊鄰。邯鄲下客。效處囊於趙相。伏惟明府公。締址瓊峰。靈岳蔽丹霄之景圖。基珠浦。神流沃清漢之波。玉札飛文。綜宏詞於楚傅。金蠶緝藝。味雅道於扶陽。孕蘭畹而生姿。澄瀾鍾高門之慶。產銅溪而寫鏐。荆藍資象德之禎。幼辨羝羊。演飛龍之祕策。夙談孔雀。對家禽之麗詞。赤野浮銜價之光。珠胎瑩色。丹穴陪來儀之迅。鳳彩含姿。靈襟轉壁。絢逸照於蘭池。神府驚蘋。韻清音於桂浦。談叢散馥。韞餘氣於九闌。筆海飛濤。駭洪波於八水。綰銅麟句。製錦鳧郊。化洽下車。恩孚攬轡。德聲含詠。仁風飄十地之雄。道化編謠。惠露灑三天之渥。狎中牟之馴雉。豈懼曉媒。驚重泉之瑞鸞。非關照舞。雖則塵飛范甑。垂銀有結綬之華。而乃調理宓紘。烹雞屈函牛之量。加以招攜白屋。勸誘青衿。遂使漱流逸客。望驥足以雲蒸。棲泌遺才。款龍門而霧會。某緯蕭末品。拾艾幽人。寓迹零壇。挹危直之祕說。託根磬渚。戢戰勝之良圖。幸以奉訓趨庭。束情田於理窟。從師負笈。私默識於書林。至於九流百氏。頗探其異端。萬卷五車。亦研其奧旨。將欲優游三樂。負杖以終年。棲遲一邱。鳴絃而卒歲。諒以糟糠不贍。甘旨之

養屢空。簞食無資。朝夕之歡寧展。是以祈安陽之捧檄。擬毛義之清塵。思魯國之執鞭。蹈孔聖之餘志。屬以養秋應節。雁序戒時。聽金將露玉共清。柳黛與荷細漸歇。實含毫振藻之際。離經析理之期。不揆雕朽之材。竊冀遷喬之路。輒期泛愛。輕用自媒。儻荆璞無見致疑。夜光不逢按劍。則沈骸九死。終望銜珠。殞首三泉。徒希結草。載塵清矚。跼影外慙。冒瀆威嚴。循心內駭。謹啓。

和學士閨情詩啓

某啓學士袁慶隆奉宣教旨垂示閨情詩並序跪發珠韜伏膺玉札類西秦之鏡照徹心靈同指南之車導引迷誤竊惟詩之興作肇基邃古唐歌虞詠始載典謨商頌周雅方陳金石其后言志緣情二京斯盛含毫瀝思魏晉彌繁布在縑簡差可商略李都尉鴛鴦之詞纏綿巧妙班婕妤霜雪之句發越清迴平子桂林理在文外伯喈翠鳥意盡行閒河朔詞人王劉爲稱首洛陽才子潘左爲先覺若乃子建之牢籠羣彥士衡之藉甚當時並文苑之羽儀詩人之龜鏡爰逮江左謳謠不輟非有神骨仙材專事元風道意顏謝特挺戕伐典麗自茲以降聲律稍精其間沿改莫能正本天縱明睿卓爾不羣聽新聲鄙師涓之作聞古樂笑文侯之睡以封魯之才追自衛之迹宏茲雅奏抑彼淫哇澄五際之源救四始之弊固可以用之邦國厚此人倫俯屈高調聊同下里思入態巧文隨手變侯調慙其曼聲延年愧其新曲走以不敏謬蒙提及謹申奉和輕以上呈未近詠歌伏深悚慙謹啓。

上司刑太常伯啓

側聞魯澤祥麟。希委質於宣父。吳坂逸驥。實長鳴於孫陽。是則所貴在乎見知。所伸由乎知己。故雖其樸。嶧山有半死之桐。賞其聲。柯亭無永枯之竹。伏惟太常伯公。儀天聳構。橫九霄而拓基。浸地開源。控四紀而疏派。自赤文薦社。曲阜分帝子之靈。紫氣浮仙。函谷誕真人之秀。本支自代。君子萬年。道叶神交。黃石授帝師之略。德由天縱。白星降王輔之精。峰秀學山。列三墳而仰止。瀾清筆海。委四瀆以朝宗。登小魯之巖。辨練光於曳馬。臨大吳之國。識寶氣於連牛。垂秋實於談叢。絢春花於詞苑。辯河飛箭。激流翻白馬之津。文江散珠。圓波漱曬龍之穴。是用德茂麟趾。削桐葉以分珪。道煥鶴池。映桃花而曳綬。旣而揆留皇鑒。忠簡帝心。奉職春宮。燦離光於青殿。代工天府。明台曜於紫宸。綜理元風。變調元氣。含輝禮樂。皎愛日以流光。毓彩文昌。映德星而開照。若乃識度宏遠。器宇疏通。明允篤誠。盛業隆於后土。惠和忠肅。元功格於上天。則伊陟謝其緝熙。巫咸慙其保乂。舉才應器。與士無私。水鏡澄花。炫金波於靈府。冰壺徹鑿。朗玉燭於神機。則鄧攸莫際其瀾。盧毓罕窺其術。故使妍媸各安其分。輕重不失其權。五教克敷。百揆時敘。折衝千里。魯連談笑之工。師表一時。郭泰人倫之度。加以分庭讓士。虛席禮賢。片善經心。揖仲宣於蔡席。一言合道。接然明於鄭階。某蓬蘆布衣。繩樞韋帶。自弱齡植操。本謝聲名。中年誓心。不期聞達。上則執鞭爲士。王庭希干祿之榮。次則捧檄入官。私室庶代耕之願。然而忠不聞於十室。學無專於一經。退異善藏。進殊



巧宦搏羊角而高翥。浩若無津。附驥尾以上馳。邈焉難托。實欲投竿垂餌。晦名迹於涓濱。抱甕灌園。絕機心於漢渚。幸屬乾坤貞觀。烏兔光華。嵩山動萬歲之聲。德水應千年之色。雖無爲光宅。欣預比屋之封。而有道賤貧。恥作歸田之賦。於是竭來甕牖。利見金門。指帝鄉以望雲。赴長安而就日。美芹之願。徒有獻於至尊。蟠木之姿。誰爲容於左右。明公決幾成務。論道經邦。一顧之隆。駘足逾於仙驥。片言之重。魚目軼於靈蛇。庶望顧兔離箕。動薰風於舜海。從龍潤礎。需甘澤於堯雲。則膾餘之魚。希振鱗於吳水。膳後之豕。翻化龜於魯津。拜伏階墀。增懼木谷。謹啓。

上李少常啓

竇王啓。竊惟陰陽作炭。化一氣以陶甄。天地爲爐。混萬物爲芻狗。然則璧輪均照。或流景於萊城。玉燭平分。獨翔寒於黍谷。是汗隆迭襲。榮悴相循。得氣者繁滋。失時者零落。伏以君侯疏乾激派。龍門開竹箭之波。鎮地橫基。鵠翅峙蓮花之嶺。曜重暉於若月。炳疊彩於非烟。至若瑞動赤符。著元勳於東漢。烽驚紫塞。宣武功於北征。奕葉龍光。聯蟬龜紐。德由天縱。白星降王輔之精。道叶神交。黃石授帝師之略。故得三千運北。擊舜海以遊鱗。九萬圖南。望堯雲而矯翰。折衝千里。魯連談笑之功。師表一時。郭泰人倫之度。於是九重銜紱。懸星彩於宸維。四達埋輪。振霜威於權石。加以分庭讓士。虛坐禮賢。片善必甄。揖虞翻於東甯。一言可紀。許顧榮以南金。竇王蟠木朽株。散樽賤質。牆面難用。灰心易寒。退無毛薛之交。進乏金張之援。

塊然獨居。十載於茲矣。然而日夜相代。笑溝壑之非遙。貧病交侵。思薜蘿而可託。欲乘幽控寂。進綺季於青山。樂道棲真。從魯連於滄海。幸屬舜門廣闢。漢幣交馳。遂得佇嘯高邱。應箕文而動韻。聆吟大野。浮艮岫以流陰。將恐在藻纖鱗。終寡登龍之望。棲榆弱羽。徒仰搏鵬之高。所冀曲逮恩光。資餘潤於東里。襲承導引。托輕夢於南柯。撫己多慙。循躬增懼。謹啓。

上兗州刺史啓

側聞未遇孫陽。鹽車無絕塵之迹。時逢和氏。荆山有連城之珍。豈若聽清音於鑿餘。則枯桐發響。收夜光於元璧。則怪石騰輝。在物猶然。況於含識者乎。伏惟明使君鳳穴振儀。龍門標峻。瓊雕岳立。表秀千雲。霞煥霜霏。澄虛鑒物。既而代工天府。忠簡帝心。擁熊軾而撫百城。建華旗而臨千里。坐棠敷惠。恩纏去思。剖竹垂仁。式歌來暮。清凝夜燭。化警晨鳥。外勸九農。內宏五教。道之以禮樂。齊之以刑書。約法遵寬。設蒲鞭之恥。立言惟信。控竹馬之期。甘雨隨車。雲低輕重之蓋。還珠合浦。波含遠近之星。至如臥理稱難。坐嘯匪易。披裳問疾。垂髮景以字人。褰帷廣聽。穆薰風而扇物。飛霜秋降。叶隼擊而防小人。零露春濡。飾羔旌而禮君子。於是仁必有勇。吏不忍欺。美譽鬱於三齊。芳聲騰於萬古。若乃清規遠鏡。皎月色於靈臺。元鑒虛凝。穆松風於智府。研幾十篋。探蹟九流。緝翠萼於詞林。絳仙花於筆苑。文江翻浪。織玉激以韜霞。學海驚瀾。綴珠連於濯錦。加以懸榻待士。擁筭禮賢。汲引忘疲。獎題不倦。懷經味道之客。望範圍而駿奔。兼流包

略之夫。窺義園以遐集。求小善於毫芥。顧正禮於二龍。振幽滯於泥沙。許公明以一驥。某淹中故俗。體樸厚之清規。稷下遺屯。陶禮義之餘化。頗遊簡素。少閱縑緗。每蟋蟀淒吟。映素雪於書帳。莎雞振羽。截碧蒲於翰池。既而學異懷蛟。才非夢鳥。價不齊於南漢。芳不重於東山。幸屬日月光華。雲霞紛郁。方結羨魚之網。將謫扣角之詞。奮短鬪於搶榆。希高標之餘拂。濯纖鱗於涓滴。望鴻澤之微密。所冀顧盼曲流。翦拂增價。則鉛刀起一割之用。跛鼈致千里之行。是知竊混吹於齊竽。濫飛聲於郢唱。抱山雞而自慙。願遼豕以多慙。輕觸威嚴。不遑流汗。謹啓。

上兗州崔長史啓

側聞豐城戢耀。駭電之輝。俄剖沙邱。蹤迹躡雲之轡。載馳然則激溜侵星。佩潛蛟於壯武。騰鑣歷塊。騁蹀駿於咸陽。且煦轍波鱗。側羨鼈潭之躍。觸籠雲翼。扁望鵬程之迅。是以齊郊夕唱。牛歌挾白石之詞。漢境朝趨。車候警拂塵之思。伏惟某公。騰瀾浴景。濟靈派以含珠。擢幹捎雲。翊孤巖而聳桂。崇基疊秀。匡竊道於周盟。茂緒聯輝。贊文場於漢成。偉龍章之秀質。騰孔雀於麟年。叶鳳彩之英資。辯蟾精於弱歲。雲臺宏遠。聘霄練於霜潭。册府幽深。絢朝虹於璧渚。心波湛漢。泳耀魄於黃陂。情岳干天。縉風雲於嵇嶽。龍津共濟。競欣登御之車。蕪室欽賢。必攬澄清之轡。鬱文條而耀彩藻。逸潘花蔚詞鋒。而銜奇光。浮衛玉。然則崑溪既琢。必見山川之精。樹羽已懸。行嗣雲韶之響。是以佐龜陰而演化。務肅百城。翼麟壤以宣風。恩覃千

里微猷克著。逾盛德於休徵。聲績聿宣。軼英規於恭祖。佩呂刀而劭美。已贊襄帷之遊。屈龐驥而流芳。將  
聘仁風之駕。加以側階引彥。鑿馮子之微言。倒屣延賓。辯王生之雅量。故使回流之下。探照乘於長波。高  
岫之巔。剖連城於幽石。某瓶筭小器。蠅蚊末材。環帶嶧桐。戢晞暘之厚德。傍鄰汶篠。慕貫時之貞勁。但以  
容膝一邱。曲阜之瓢。遽切枕肱五畝。成都之壁已窮。擔石厭於糟糠。負薪疲於菹褐。然而少奉過庭之訓。  
長趨克己之方。弋志書林。咀風騷於七略。耘情藝圃。假圖籍於九流。洒惠渥於羊陂。屢泛文通之麥。峻曲  
岸於鴛谷。時遺公叔之冠。雖不能縱逸韻於霜皋。唳野致九天之響。而頗亦蓄餘香於露薄。垂芬有十步  
之芳。而乃慙跡魯鴻。非荆山之抵鵠。篋名韓犬。歎稽臯之橫梁。方今玉瑄繼秋。金風動穎。吳宮歸乙。望陰  
岫以依遲。素林返雁。候陽潮而低舉。瀛金味道之子。伴纁帛以彈冠。屑玉含毫之人。望弓旌而翹足。竊不  
揆於庸識。輒輕擬於揚庭。所冀曲逮恩波。時流咳唾。儻能分其斗水。濟濡沫之枯鱗。惠以餘光。照霜棲之  
寒女。得使伏櫪驚蹇。希騏驎而蹠足。竄棘翮羽。排鴛鸞而刷羽。則捐軀匪慙。碎首無辭。雖復投報揚金。君  
子以之貽戒。效誠魏草。小人之所懷恩。輕瀆威嚴。深懼履尾。載塵聽覽。迫甚蹈冰。謹啓。

上兗州張司馬啓

某啓。竊聞網澗緝裳。僊指雲於偃蓋。排虛止棘。附絕電於織離。然則左右爲容。鏘金有階於蟠木。無因而  
至。按劍致懼於連城。是以貨牘干榮。發切資於禽息。求光抱燧。束髮濟於于髡。伏惟某官瓊峯聳峭。儼曦

觀而爭峙。瑤派驚瀾，泝天潢而比瀆。漢臺引路，夕翊浮雲之陰。晉閣垂璫，朝煜文星之苑。劍池濯彩，耀震德於渥津。弱水攜祥，炫離精於丹穴。辨懸曠於朗鏡，肇自鱸年。對似魄於虧陽，光乎弱歲。言阿激箭，浴紫貝以飛湍。情岳驚峯，蔽丹霄而傑峻。文條擢秀，馥長坂之幽蘭。筆苑揚葩，煜小山之丹桂。松廳結韻，摺紳緒以雌黃。嵩電流光，通賢資其月旦。於是佐襄帷於魯甸，威讐列藩。匡露冕於梁陰，恩覃絕境。緝諧麟甸，下白鶴於仙庭。輔弼臯郊，重黃金於帝里。加以獎拔幽滯，汲引英髦。錫以吹噓，暖燕郊之陰谷。延之顧盼，焰漢固之寒灰。某篠派庸微，桐巖賤伍。託根鄒邑，時聞闕里之音。接聞零津，屢聽杏壇之說。加以承斷織之慈訓，得銳志於書林。奉過庭之嚴規，遂容情於義圃。方欲閉門卻掃，養拙以終年。幽遁罄坏，甘貧而卒歲。直以栖遲五畝，獲鶴鷄之數粒。蕭條三逕，置侏儒之斗儲。雖則放曠林泉，頗得閒居之趣。而乃寂寞蓬戶，唯深色養之憂。是以望檄動容，慨南陽而聞寂。祈名夙駕，嘆郢路而依遲。方今涼秋屆節，嚴飈扇序。衡陽極浦，振朝音於負霜。寒皋廻甸，驚宵吟於靜野。弓旌之禮，斯及。辟聘之際，是期。不揆庸愚，輕斯自銜。所冀分其末照，惠以餘波。得預觀光，全由咳唾。倘雲鑣釋綬，申其漱玉之音。霜匣開輝，照以盤蛟之影。則陰山之雀，敢懷滄蘂之心。漢東之蛇，期致投珠之報。不勝窘迫之至。謹啓。

## 上齊州張司馬啓

某啓。昔者薛邑聞歌，揖馮驩於彈鋏。夷門命駕，顧侯嬴於抱關。何則志合風雲，載笠均乎乘馬。情諧道術，

忘筌貴乎得魚。是以挹蘭言於斷金。交蓬心於匪石。庶清音動聽。賞流水於牙絃。妙思通神。叶成風於郢匠。伏惟公疏源白水。浸地軸以輪波。纂慶黃軒。感星精而誕命。綴珠華於七曜。聯玉葉於五雲。至夫神石。攜祥靈。鈎表貺。千年馭鶴。振仙駕於帝鄉。七葉珥貂。襲榮光於戚里。固以紛綸國牒。昭晰家聲。泊乎鹿走周原。輔秦圖而興霸。蛇分沛澤。翌唐運以開基。常山王之玉潤金聲。博望侯之蘭薰桂馥。羽儀百代。掩梁寶以霞舉。鍾鼎一時。罩袁楊而岳立。故得重規遠鏡。滿月路以流清。茂祉遐鋪。架雲門而擢秀。英飛鳳穴。藻五色以凝華。穎躍龍泉。涵九重而毓潤。風情疎朗。霜明月湛之資。氣骨端嚴。雪白冰清之概。若乃性符神授。道擅生知。挫三端於情峯。朝九流於學海。博聞強識。辯晉國之黃熊。將聖多能。識吳門之白馬。言泉漱迴。驚瀑布以飛瀾。文江澹清。含濯錦而翻浪。鬱槐市而增茂。穆蘭室以流芳。於是翔鯨應符。觀光上國。飛龍成卦。利見大人。搏羊角以垂天。展驥足而騰景。化貳藩邸。紹敬祖之清廉。光贊外臺。陳君回之亮直。推公平而折獄。磔鼠謝其嚴明。擁端慙而字人。化蛇慙其智勇。加以清規日舉。湛虛照於冰壺。元鑒露凝。朗機心於水鏡。謙光自牧。恭己愛人。片善必甄。揖虞翻於東籬。一言可紀。許顧榮以南金。某疾抱支離。材均擁腫。進不能握蘭分竹。縮銀黃於雲臺。退不能絕粒茹芝。煉金丹於地肺。而出沒風塵之內。淪漂名利之間。游無毛薛之交。仕乏金張之援。塊然獨處者。一紀於茲矣。然而日夜相代。恐溝壑之非遙。貧病交侵。思薜蘿之可托。常願處幽控寂。追夏黃於商山。樂道棲真。從魯連於滄海。豈圖語默易爽。心迹難并。題橋

之恨愈深。攀桂之情徒結。是用絕深乾沒。耽閱邱墳。謁子將於南荆。訪康成於北海。西遊梁益。效司馬王。揚之風。東入臨淄。慕淳于管晏之智。瞻言前古。徒欲思齊。俯惟當今。空勞懷刺。不意雲浮礎潤。霜落鐘鳴。揖郭泰於仙舟。有道斯在。賞嚴明於樽俎。盛德猶存。雖雅調清歌。誠寡和於郢路。而庸音濫吹。竊混奏於齊筭。輕撮課囊。揄揚盛德。庶金波離畢。零陵之石自飛。瑤光建寅。蕭邱之火漸燕。學漸鱗角。德類鴻毛。愧汗如漿。憂心若厲。謹啓。

上廉使啓

賓王啓。每讀書。見古人負米之情。捧檄之操。未嘗不廢書輟卷。流涕傷心。何則。情蓄於中。事符則感。形潛於內。迹應斯通。而悅帝力以栖魂。情欣養素。仰皇華而暢慮。敢用披丹。伏惟公源控玉輪。激神濤而涵地。基疏金闕。架飛岳以縉雲。泊乎鹿走周原。霸燕圖於卽墨。蛇分沛澤。封漢爵於華城。福祿攸鍾。公侯必復。炳靈丹穴。習吉黃裳。若乃峯秀學山。列三墳而仰止。瀾清筆海。委九流以朝宗。登小魯之山。辯練光於飛馬。臨大吳之國。識寶氣於連牛。垂秋實於翰林。絢春花於文苑。清規滿秀。照月旦而雕談。素論凝元。開夜光於妙辯。旣而業成鱗角。引茅茹而彈冠。道映鳳池。絢桃林而曳綬。揆留皇鑒。忠簡帝心。奉職春宮。標離光於青殿。代工天府。明台燿於紫宸。故得龍紵垂光。戢兩星而開照。鶴蓋浮影。翼五雲以連陰。某大塊流形。小人餘慶。幸河神入昴。映白榆以流祥。江使負圖。泛青蓮而薦兆。薰風廣扇。聖日多輝。進不能高議雲。

臺談社稷之上務。退不能銷形地肺。揖箕穎之餘芳。而出沒風塵。湮淪名利。十年無棣。萬里惟桑。既而日  
遠長安。出蓬門而西笑。雲飄吳會。迺松浦以南浮。冀塵迹邱中。絕漢機於俗網。承歡膝下。馭潘輿於家園。  
不悟地絡遐張。維白駒於空谷。天羅迴布。弋黃鶴於高雲。顧已驚鈍。並從媒銜。力農賤事。未免東皋之勞。  
反哺私情。遽切南陔之詠。少希願復。輒布悃誠。雖噓指思歸。空軫倚閭之望。而嚙臂求仕。非岡高蓋之榮。  
明公資孝履忠。恕己及物。惟幾成務。論道經邦。庶願兔雖箕。動薰風於舜海。從龍潤磻。霑甘雨於堯雲。則  
白羽書生。自銘恩於食稻。黃裳童子。將賽德於餐花。拜首迴惶。傾心靈深。謹啓。

上郭贊府啓

竇王啓。側聞樞精。嘯谷。韻清瀨於驚蘋。震德昇乾。鬢元枝而布暖。雖涸鱗濡沫。尙缺望於鯨波。而決羽搶  
榆。頗思遷於鶯樹。伏惟公瓊基疊秀。積珠構於三龍。玉翰驚華。煜瑤林於八桂。仙飛有道。滎河泛高尙之  
舟。德驗通神。靈策動幽明之鏡。產耶溪而濯質。霜鐔郢豐匣之姿。孕鍾嶺而飛華。虹玉絢荆巖之氣。松秋  
表勁。翊賴霞而插極。菊晚馳芳。涵清露而炫沼。鑿懸龍鏡。明逸照於咸陽。韻入鳧鐘。驚洪音於長樂。心源  
泛藻。控鼉壑以朝宗。情嶽披蓮。掩龜岑而作鎮。惠牛曜辯。驚荀鶴於談叢。揚鳳摛文。詠鄒龍於筆海。故佐  
銅章於磬渚。側扇文鯁之風。武墨綬於銅郊。讚誘祥鸞之化。絃揮單父。弼清韻於稽琴。化洽中牟。翊馴羣  
於潘雉。加以延賓置驛。接士軾廬。採拔芻微。邁欽賢於司馬。提獎幽滯。軼取俊於淳于。某甕牖輕生。席門



賤品幸以參名比屋。悅康衢以自娛。預迹耦耕。欣日出而知作。又以家傳素業。弋書林而騁志。少奉庭訓。馳文圃以遊魂。至於白簡青箱。頗測探其奧旨。竹書石記。亦幽求其邃原。雖未能叫徹帝關。聲馳宰府。而頗亦見推里閭。譽浹鄉閭。方今銀箭纏秋。金壺應節。吮墨翹足。希造杖於一枝。味道彈冠。望橫經於重席。不量庸昧。竊冀揚庭。伏乞恩波。暫垂迴盼。倘使陳留逸調。下探柯亭之篠。會稽陰德。傍眷餘溪之蔡。則迴眸之報。不獨著於前龜。清亮之音。誰專稱於往笛。雖滄溟遠量。敢不愧於牛溲。而嵩岱洪恩。終曾酬於蟻垤。輕喧視聽。憂讐惟深。猥瀆階庭。兢惶交集。謹啓。

上梁明府啓

竊聞薛邑聞琴。揖馮諼於彈鋏。夷門佇駕。顧侯嬴於抱關。何則志合風雲。戴笠均乎乘馬。情諧道術。忘筌貴乎得魚。是用挹蘭言於斷金。效蓬心於匪石。庶清音動聽。賞流水於牙絃。妙思通神。叶薰風於郢匠。伏惟某公儀天峙構。層基控射牛之峯。浸地開源。驚濤疏釣鼈之浦。至夫封侯廟食。掩金張以竊竊。三主七公。罩袁揚而岳立。故得重規遠鏡。湛月路以流清。茂社遐鋪。駕雲門而擢秀。若乃博聞強記。辨晉國之黃熊。將聖多能。識吳門之白馬。言泉漱迴。驚瀑布以飛瀾。文江澹虛。涵濯錦而翻浪。於是功超食跡。位典烹鮮。水鏡澄瀾。照孤鸞之舞影。鳴琴動操。叶馴暈之雅音。既而盛德有鄰。佐皇華而省俗。居羣不器。扈輶軒而觀風。某疾抱支離。材均臃腫。自弱齡植操。本謝聲名。中年誓心。不祈聞達。始則執鞭爲仕。帝里希千祿。

之榮。次則捧檄入官。私庭庶代耕之樂。然而忠不聞於十室。學無專於一經。退異善交。進殊巧宦。搏羊角而遐翥。浩矣無津。附驥尾以上馳。邈焉難託。實欲垂竿投餌。晦名迹於涓濱。抱甕灌園。絕機心於漢渚。幸屬乾坤貞觀。烏兔光華。嵩山動萬歲之聲。德水應千年之色。雖無爲光宅。忻預比屋之封。而有道賤貧。恥作歸田之賦。明公顧盼成飾。咳唾爲恩。漏微潤於江波。流末光於鄰燭。幽禽遷木。侶丹山於帝梧。鳴石浮川。應黃鍾於僊管。敢布心也。詎能望焉。謹啓。

謹案此據永樂大典本採入。與今傳本詳略互異。附載其後。夷門揖抱關於侯子。誤惟成風之。竊思通神流水之。絃清音入。聽況夫志合者蓬心可采。情諧者蘭味寧忘。伏惟公儀天登。擢屨基控。射牛之岸。浸地開源。鸞澗疏釣。鼉之浦。至夫封侯廟食。掩金許以霞。寧三主八公。單袁揚而居立。於是功超振鷺。位與空鮮。水鏡澄淵。照翔鸞之。琴動操。叶馴雉之雅音。其而盛德有輝。佐皇華而撫俗。君子不器。屈輻軒以觀風。某蒲石橋。運聲鄉蓬。轉不叶十室。無專一經。寧驥逸而無由。仰鳴飛而自失。公顧盼成飾。咳唾爲恩。庶微潤於江波。冀末光於鄰燭。使幽禽遷木。侶丹山於帝梧。鳴石在川。應黃鍾於僊管。敢布心也。詎能望焉。謹啓。

上吏部侍郎帝京篇啓

賓王啓。昨引注日。垂索鄙文。拜手驚魂。承恩累息。楚帶丹質。在荆南以懷慙。遼豕白頭。望河東而載惡。賓王散樗易朽。蟠木難容。雖少好讀書。無謝高鳳。而老不曉事。有類揚雄。徒以易象六爻。幽贊通乎政本。詩人五際。比興存乎國風。故體物成章。必寓情於小雅。登高能賦。豈圖榮於大夫。蓋欲樂道遺榮。從心所好。非敢希聲刻鵠。竊譽雕蟲。至若資醜行以自媒。銜庸音而苟進。固立身之殊路。行己之外篇矣。君侯蘊明略以佐時。虛靈臺以照物。觀梁父之曲。識臥龍於孔明。聽康衢之歌。得飯牛於甯戚。是用異人翹首。俊父

歸誠獨此疵賤之姿，謬奉清通之盼。雖仲由之瑟，終闕響於邱門。而宋玉之謠，儻均音於郢路。敢忘下里，輕用上呈。庶道叶起予，陳卜商之四始。恐吾幾失子，效然明於一言。拜首增慙，憂心如醉。謹啓。

代李敬業討武氏檄

僞臨朝武氏者，性非和順。地實寒微，昔充太宗下陳，曾以更衣入侍。洎乎晚節，穢亂春宮。密隱先帝之私，陰圖後庭之嬖。入門見嫉，蛾眉不肯讓人。掩袖工讒，狐媚偏能惑主。踐元后於鞶帶，陷吾君於聚塵。加以虺蜴爲心，豺狼成性。近狎邪佞，殘害忠良。殺子屠兄，弑君鴆母。神人之所共疾，天地之所不容。猶復包藏禍心，竊窺神器。君之愛子，幽在別宮。賊之宗盟，委以重任。嗚乎！霍子孟之不作，朱虛侯之已亡。燕啄皇孫，知漢祚之將盡。龍躒地后，識夏庭之遽衰。敬業皇唐舊臣，公侯冢子。奉先帝之遺訓，荷本朝之厚恩。宋微子之興悲，良有以也。袁君山之流涕，豈徒然哉。是用氣憤風雲，志安社稷。因天下之失望，順宇內之推心，爰舉義旗，以清妖孽。南連百越，北盡三河。鐵騎成羣，玉軸相接。海陵紅粟，倉儲之積。靡窮。江浦黃旗，匡復之功。何遠。班聲動而北風起，劍氣衝而南斗平。暗鳴則山岳崩頽，叱咤則風雲變色。以此制敵，何敵不摧。以此攻城，何城不克。公等或居漢地，或叶周親。或膺重寄於話言，或受顧命於宣室。言猶在耳，忠豈忘心。一坏之士未乾，六尺之孤安在。儻能轉禍爲福，送往事居。共立勤王之勳，無廢大君之命。凡諸爵賞，同指山河。若其眷戀窮城，徘徊歧路，坐昧先幾之兆，必貽後至之誅。請看今日之域中，竟是誰家之天下。移檄

州郡咸使知聞。

兵部奏姚州破逆賊諾沒弄楊虔柳露布

尙書兵部臣聞北極列象六合奉天子之尊南面乘乾一統成聖人之業是知衣裳所會義有輯於殊鄰霜露所均誠兼育於異類故塗山萬國誅後至者防風丹浦一戎緩前禽者就日然則利弧矢以威天下法雷霆以靖域中四時行焉天道不能去殺五兵備矣皇業所以勝殘雖事切救焚苟順時以濟物恩深祝網不獲已而用兵伏惟皇帝陛下登翠嬀以握鬪憲紫微而正象元功不宰混太始以凝神至道無名佇華胥而得夢闡文教以清中夏崇武功以制九夷環海十洲通波太液之水鄧林萬里交影甘泉之樹反踵穿胸之域襲冠帶以來王奇肱儻耳之曾奉正朔而請吏逆賊蒙儉和舍等浮竹遺種沈木餘苗邑殊禮義之鄉人習貪殘之性日者王明廣燭帝道遐融頗亦削左衽而被朝衣解椎髻而昇華冕而豺狼有性梟獍難馴遂敢亂我天常變九隆而背誕負其地險攜七部以稽誅騷亂邊疆皺顛州郡是用三門授律長驅無戰之師五月渡瀘深入不毛之地去月二十一日軍次三鼎崑崙嶺前後捕得生口知守捉山羌傍山連結十部蠻首徒五萬衆此山卽南郡中之巨防也岡蠻千里西通大荒之郊溪谷萬重南極炎洲之境聳喬林而插漢陰兔有假道之標拔崇巖以隱天陽烏無迴翼之地峯危束馬路絕懸車賊踞臨岱之形負建瓴之勢微風召雨蝟起蜂飛驅雜種以挺穴封狐千里肆沈黎而作孽雄虺九頭臣以爲

制敵以權。柔遠者祇成於德教。伐叛以義。決勝者不在乎干戈。於是廣布朝恩。恭宣帝澤。申之以安撫。曉之以存亡。信重蠻陬。無負黃龍之約。賞隆漢爵。不渝白馬之盟。而地接冉驪。詞屢殫於喻蜀。俗通槃瓠。聲不輟於吠堯。臣遣左三軍子總管寧遠將軍前守右驍騎萬安府長史折衝都尉上柱國劉會基率檢校果毅驍騎尉并陘縣開國男劉元暎等。銜枚遠襲。卷甲前驅。偃危旆而設潛兵。疑從天落。乘閒道而掩不備。若出地中。又遣右三軍子總管明威將軍行右武衛翊府中郎將上柱國高奴弗率左武衛天水府折衝都尉張仁操等。陟南山之南。衝其要害之路。又遣左一軍子總管前右金吾衛翊府左郎將上柱國孫仁感率衛尉府右果毅都尉王文雅等。陵北山之北。絕其飛走之塗。賊首領楊虔柳。諾沒弄。諾覽斯等。振螳螂之力。拒轍當輪。縱蚊蚋之羣。彌山滿谷。劉會基高奴弗孫仁感等。並忠勤克著。知略遠聞。識明君之重恩。輕生有地。提太阿之神劍。視死無時。彎弧而兇黨土崩。舉刃而妖徒瓦解。雖危若沸鼎。未窮梟首之誅。救死扶傷。猶致析骸之饗。二十二日。臣遣副總管兼安撫副使定遠將軍前左驍騎翊府中郎將令狐知通率右武衛良將壯府左果毅都尉韓惠德等。擁貔豹之雄。順天機而左轉。遣管內安撫副使朝議大夫使持節守銀州刺史上柱國宜春縣開國男李大志率前左武衛靜初府右果毅都尉上柱國陳宏義等。驅象犀之卒。乘地軸以右迴。又遣行軍司馬朝散大夫守雋州都督府長史上柱國梁待辟率守右金吾衛宜昌府果毅都尉闔文成等。總投石拔距之材。蹈中權而拊其背。又遣前守右威衛龍西府果毅都

尉康留買等。騰躍鐵歌金之騎。犯前茅而扼其喉。臣等率守左衛清宮府左果毅許懷秀等。橫玉弩以高臨。縱金鉦而直進。元雲結陣。影密西郊。赤莖揮鋒。氣衝南斗。飛塵埃而匝地。白日爲之晝昏。掃氛祲以稽天。滄溟爲之晦色。兵交刃接。鳥散魚驚。自卯及申。追奔逐北。斬首千餘級。轉戰三十里。激流膏而爲泉。似變萋宏之血。委亂骸而擠壑。若泛鼉靈之屍。旣而照盡高春。雲昏乙夜。賊乃收集餘衆。保據重巖。臣度彼遊魂。慮其宵遁。使三軍齊進。四面合圍。二十三日。乘魚爛之危。啓蛇行之陣。揚麾誓衆。杖節訓兵。一鼓先登。賞必懸於芳餌。九攻案律。罪無赦於嚴誅。五部雄材。三河俠少。或生居燕地。尤工卽墨之圍。或家本秦人。早習昆明之戰。叱咤則江山搖蕩。慷慨則林壑飛騰。舉鵬力以揚威。燧犀渠而賈勇。澄氛廓祲。回夏景以潰春冰。滅迹掃塵。若霜風之捲秋。擗戰踰百里。時歷三朝。前後生擒四千餘人。斬首五千餘級。諾沒弄楊虔柳等。殞元行陣。懸首旌門。蒙儉和舍等。委衆奔馳。脫身挺險。雖復刑以止殺。丁壯咸伏於誅。夷禮不重傷。斑白必存於寬宥。昔魏臣賦蜀。徒聞蒟醬之奇。漢使開邛。纔通竹杖之利。豈若膺紫泥而弔伐。指丹徼以臨戎。一戰而孟獲成擒。再舉而哀牢授首。斯並皇威遠暢。廟略遐覃。奉元猷以配天。徒知帝力。掩皇輿而闢地。豈曰臣功。無任慶快之誠。謹遣某奉露布以聞。軍資器械別簿條上。

兵部奏姚州破賊設蒙儉等露布

臣聞七緯經天。星墟分張翼之野。八紘紀地。炎洲限建木之鄉。西距大秦。雜金行而布氣。南通交趾。枕銅

柱以爲鄰。俗帶白狼。人習貪殘之性。河淪赤虺。川多風雨之妖。水積炎氛。山涵毒霧。竹浮三節。肇興外域之源。木化九隆。頗爲中原之患。年將千紀。代歷百王。鄭純之化不追。孟獲之風逾煽。故三年疲衆。徒聞定管之譏。五月出師。未息渡瀘之役。然則大人拯物。上聖乘期。法乾坤以握樞。體剛柔而建極。知仁義不能禁暴。設刑網以勝殘。知揖讓不可濟時。用干戈而靖亂。伏惟皇帝陛下。祥摛戴玉。拓地軸以登皇。道契書繩。掩天紘而踐帝。元雲入戶。纂靈瑞於丹陵。蒼籙升壇。薦禎圖於翠渚。垂衣裳以朝萬國。崇玉帛而禮百神。昭儉防奢。露臺惜中人之產。宣風布政。明堂法上帝之宮。致羣生於太和。登品物於仁壽。四神踐雪。五老飛星。君囿祥麟。樂班文於仙卉。女牀鳴鳳。韻歸昌於帝梧。四陝同文。五方異色。鄧林萬里。纒疏苑囿之基。曾城九重。未出池隍之域。六合照臨之地。候月歸琛。大鎚覆載之間。占風納賚。蠢滋蠻貊。敢亂天常。橫赤標以疏疆。背朱提而設險。山林萬仞。巖邑千尋。望秦阜以相傾。崤陵失四塞之阻。對梁山而錯峙。劍門成一簣之峯。自謂絕壤遐方。中外足以迷聲教。憑深負固。江山可以逃靈誅。不知玉弩垂芒。凶水無九嬰之沴。瑤階舞戚。洞庭有三苗之墟。臣等謬以散材。忝專分闢。自白招乘候。順秋帝以揚旌。絳節臨邊。通夜郎而解辯。雲開舊穴。旆轉平川。峻岐折坂之危。盡忘襟帶。滇池漏江之固。曾莫藩籬。唯逆賊設蒙儉等。未革狼心。仍懷豕突。陸梁方命。旅拒偷生。城接祠雞。竟無希於改旦。山多神鹿。終未息於擇音。臣以大帝宣威。有征無戰。明王仗順。先德後刑。宏聖澤於中孚。緩天誅於大造。庶南薰解愠。仰雲闕以翔魂。東律變音。

扣轅門而頓顙。而祝禽疎網。徒開三面之恩。毒虺挺災。逾肆九頭之暴。乃鳩集餘衆。蟻結兇徒。僮耳椎髻之渠。千里霧合。鑿齒雕題之孽。一呼雲屯。凌石菌以開營。拒巖椒而峻壘。崇巒切漢。若登藏寶之山。絕壑憑霄。似瞰封泥之谷。以前月十七日。連營布陣。踞險揚兵。東西三十餘里。馬步二十餘萬。聚蚊蚋而成響。聲若雷霆。縱蛇豕以爲羣。氣衝宇宙。臣遣中郎將令狐智通等。擁拔山超海之師。當其步陣。遣銀州刺史李大志等。驅躍景騰雲之騎。乘其馬軍。遣蕙州都督府長史行軍司馬梁待辟等。領勁卒三千。絕其飛走之路。遣臨源府果毅馬仁靜等。勒精兵九百。斷其潛伏之軍。臣率行軍長史韓餘慶等。負霜戈而直進。指雲陣以長驅。庶令斬馘七擒。戰士挾雷公之怒。伏屍百里。蠻夷識天子之威。於是三略訓兵。五申誓衆。先登陷敵。無遺大樹之功。后拒亂行。必致曲梁之罰。楚人三戶。蜀郡五丁。氣擁元雲。精貫白日。暗鳴則乾坤搖蕩。呼吸則林壑沸騰。列旗幟以雲舒。似長虹之東指。橫劍鋒而電轉。疑大火之西流。刃接兵交。洞胸達腋。自辰踰午。魚爛土崩。沸殘息於層峯。更切守陣之哭。積圓顛於重阜。殆成京觀之封。唯賊帥夸千。未悟傾巢之兆。敢懷拒轍之心。獨率馬軍。憑川轉鬪。驚塵亂起。六合爲之寢光。殺氣相積。四溟由是變色。副總管李大志。忠唯殉國。義則忘軀。臨危而貞節逾明。制敵而神機獨遠。丹誠自守。雖九死其如歸。白刃交前。豈三軍之可奪。投袂則妖徒霧廓。舉旗而逆黨冰摧。於是乘利追奔。因機深入。困獸猶鬪。如戰廩君之魂。窮鳥尙飛。如驚杜宇之魄。斬甲卒七千餘級。獲裝馬五千餘匹。僵尸蔽野。臨赤坂而非遙。流血灑途。視丹



微以何遠。首領和舍等。並計窮力屈。面縛軍門。寬其萬死之誅。宏以再生之路。唯蒙儉脫身。鋌險負命。窮山。願巢穴而靡依。延晷漏其何幾。況妖徒革面。徼外非復他人。部落離心。舟中皆爲敵國。瞻言梟首。指日可期。凡在歸降。隨事招撫。與之經始。復其故業。首邱懷戀。疑臨故國之墟。安堵知歸。似入新豐之市。然後班師。遯水。振旅。禺山。建鴻勳於武功。暢元猷於文教。庶荒陬襲中邦之禮。邊疆息外戶之虞。華封祝堯。兆皇基於千載。夷歌頌漢。美王澤於三章。宜與夫天帝前星。廣賜秦公之冊。坤元益地。遙開王母之圖。蓋亦有云。曾何足紀。斯並元謨。廣運。廟略遐覃。一戎而荒景肅清。再鼓而邊隅底定。豈臣等提戈擐甲。克全百勝之功。仗節揚麾。能通九變之策。詣藁街而獻旅。大帝成規。開枵杜以勞旅。小臣何力。不勝慶快之至。謹遣行軍司馬朝散大夫。守雋州都督府長史。上柱國梁待辟。奉露布以聞。軍資器械別簿錄上。

秋日於益州李長史宅宴序

夫以五岳棲真。杳眇清溪之上。六爻貞遁。寂寥滄海之濱。斯並激俗矯時。獨善之風。自遠。懷材蘊智。兼濟之道未宏。長史公元牝凝神。虛舟應物。得喪雙遣。巢由與許。史同歸。寵辱兩存。廊廟與山林齊致。乘展驥之餘暇。俯沈犀以開筵。曲浦澄瀟。似對任棠之水。芳亭興洽。如歸山簡之池。加以秋水盈襟。寒郊滿望。洲渚肅而兼葭變。風露凝而荷芰疎。忘懷在真俗之中。得性出形骸之外。雖四子講德。已頌美於中和。而五際陳詩。未形言於大雅。爰命虛詠。題其序云。弁側山頽。自有琴歌留客。操觚染翰。非無池水助人。盍各賦

詩式昭樂事云爾。

冒雨尋菊序

白帝徂秋。黃金勝友。解塵成契。冒雨相邀。問涼燠則鴻雁在天。絃交游則芝蘭滿室。砌花舒菊。還同載酒之園。岸葉低松。直枕維舟之浦。參差遠岫。斷雲將野鶴俱飛。滴瀝空庭。竹響共雨聲相亂。仰折巾於書閣。行閱飄麈。挹雅步於琴臺。坐聞流水。字中蝌蚪。競落文河。筆下蛟龍。爭投學海。珠簾映水。風生曳露之濤。錦石封泥。雨濕印龜之岸。泛蘭英於戶牖。座接雞談。下木葉於中池。廚烹野雁。墜白花於濕桂。落紫蒂於疎藤。雖物序足悲。而人風可愛。留姓名於金谷。不謝季倫。混心迹於玉山。無慚叔夜。

晦日楚國寺宴序

夫天下通交。忘筌蹄者蓋寡。人間行樂。共烟霞者幾何。羣賢抱古人之清風。翫新年之淑景。情均物我。緇衣將素履同歸。迹混汗隆。廊廟與江湖齊致。於時春生城闕。氣改川原。聞遷鶯之候時。行欣官侶。見游魚之食餌。坐悟機心。加以慧日低輪。下禪枝而返照。法雲凝蓋。浮定水以涵光。忘懷在真俗之中。得性出形骸之外。雖交非習靜。多慚谷口之談。然醉可逃諠。自得山陽之氣。詩言志也。可不云乎。

餞宋三之豐城序

黯然銷魂者。豈非生離之恨與。帝里天津。槐衢分黑龍之水。巴陵地道。楓江連白馬之門。親友徘徊。緇歎

言於促膝。故人樽酒。掩離涕於交頤。於時晚吹吟桐。疑奏別離之曲。輕秋入麥。似驚搖落之情。白日將頽。青山行暮。想姑蘇之地。夕露沾衣。望吳會之郊。斷風飄蓋。嗟乎歧路。是他鄉之恨。溝水非明日之歡。玉斗臨吳。太阿之氣可識。金陵背楚。小子之路行遙。盡各賦詩。式昭離緒。

初夏邪嶺送益府竇參軍宴詩序

分首三春。送君千里。青山白日。非舊國之春秋。翠屏清樽。是他鄉之盃酒。況復圭峯南望。切登高之情。渭水北流。動臨川之嘆。於時寒光將歇。春景未華。殘雪飄花。猶開六出。輕冰涵影。未解三川。晨風軫孫楚之情。歧路下楊朱之淚。雖載言載笑。賞風月於離前。而一詠一吟。寄心期於別後。詩言志也。可不云乎。

秋日餞麴錄事使西州序

麴錄事務切皇華。指輪臺而鳳舉。羣公等情敦素賞。臨別館而冕分。促樽酒而邀懽。望山川而起恨。於時露團龍隰。雲斂雁天。落葉響而庭樹寒。殘花疎而蘭皋晚。聞秋聲之亂水。已愴分溝。對零雨之飄風。倍傷歧路。五日之趣。未淹蘭籍之娛。二星之輝。行照葱河之境。清颺朗月。我則相思。隴水秦川。君方嗚咽。行歌不駐。遽驚班馬之嘶。贈言可申。聊振飛魚之藻。人探一字。一韻一篇。

贈李八騎曹詩序

夫人生百齡。促膝是忘言之契。大夫四海。交頤非贈別之資。然而想山川之遼遙。送歸將遠。惜歲華之不

待行樂無時。是用輟征騶以少留。敞離亭而多暇。山芳襲吹。坐疑蘭室之中。水樹含香。宛似楓江之上。加以御溝新柳。近入離絃。賓館餘花。遙催別酒。旣而滌波東注。灞岸南登。綠蟻傾而高宴。終金烏落而離言促。雖相思有贈。終結想於華滋。而素賞無睽。盡申情於麗藻。人爲四韻。各賦一言。

揚州看競渡序

夏日江干。駕言臨眺。於時桂舟始泛。蘭棹初遊。鼓吹沸於江山。綺羅蔽於雲日。嫵媚舞袖。向綠水以頻低。飄颻歌聲。得清風而更遠。是以臨波笑臉。豔出浦之輕蓮。映渚蛾眉。麗穿波之半月。靚粧舊飾。此日增奇。絃管相催。茲辰特妙。能使洛川迴雪。猶賦陳思。巫嶺行雲。專稱宋玉。凡諸同好。請各賦詩云爾。

秋日與羣公宴序

昔挂瓢隱舜。蹈箕山而不歸。解組逃齊。泛滄波而長往。咸用潛心物外。擯影邱中。豈若擬迹小山。陶心大隱。叶仲長之怡性。偶潘岳之棲閑。羣公或道合忘筌。契金蘭而貴舊。或情深傾蓋。披玉葉以交新。於時玉女司秋。金烏返照。烟含碧篠。結虛影於鱗枝。風起青蘋。動波文於翼態。庭榴剖實。繁丹彩以成珠。岸石澄瀾。泛清漪而散錦。旣而誓敦交道。俱忘白首之情。款爾連襟。共挹青田之酒。不有雅什。何以摅懷。共引文江。同開筆海云爾。

聖泉詩序

元武山有聖泉焉。浸淫歷數百千年。垂巖泌湧。接磴分流。下瞰長江。沙堤石岸。咸古人遺迹也。茲乃青蘋綠芰。紫苔蒼蘚。遂使江湖思遠。寤寐寄託。既而崇巒左岐。石壑前縈。丹嶠萬尋。碧潭千頃。松風唱響。竹露熏空。瀟瀟乎人間之難遇也。方欲以林壑爲天屬。琴樽爲日用。嗟乎。古今代謝。方深川上之悲。少長同遊。且盡山陰之樂。盍題芳什。共寫高情。

釣磯應詰文

余以三伏晨行至七里瀨。此地卽新安之江口也。有嚴子陵釣磯焉。澄潭至清。洞澈見底。往往有羣魚戲。歷歷如水上行。舟人有釣者。試取餌投之。或有游而不顧者。或有貪而輒吞之者。引竿而舉。因以獲焉。其始出也。掉尾揚鬣。有若恃力而自免。其少退也。則鼓鰓濡沫。有似屈體而求哀。嗟乎。勢牽於人。道窮乎我。將欲以下座而歌馮子。又安能中轍而呼莊周哉。余乃祝之曰。猛獸搏也。拘於檻穽。鴛鳥攬也。繫於樊籠。素龜靈也。被髮河津。白龍神也。挂鱗且網。何不泥潛而穴處。何故貪餌而吞鈎乎。於是放之江流。盡其生之理。時同行者顧詰余曰。夫至人之處世也。擬迹而後投。隱心而後動。終始不易其業。悔吝不乖其情。而吾子沈緝於川。登魚於陸。烹之可以習政術。羞之可以助庖廚。曩求之將何圖。今舍之將何欲。余笑而應之曰。聖人不凝滯於物。智士必推移於時。知幾之謂神。舍生之謂道。殷乙聖也。囚於夏矣。孔某賢也。畏於匡矣。以明哲之賢。尙罹幽憂之患。況鱗羽之族。能無弋釣之累哉。故曩吾有心也。恐求之不得。今吾無

心也。既得之而亡求，夫求與舍不亦雙美乎？烹與羞不亦兩傷乎？況療饑者半菽可以充腹，爲政者一言可以興邦，亦奚必因小鮮而後明三異之規，勦大命而後寄一殮之飽，擒而不殺，可不謂仁乎？獲而不饗，可不謂廉乎？且夫垂竿而爲事者，太公之遺術也；形坐磻溪之石，兆應渭水之璜，夫如是者，將以釣川耶？將以釣國耶？然後知古之善釣者，其惟太公乎？又有妙於此者，其惟文王乎？夫文王制六合爲鈞，懸西伯爲餌，薦之於清廟，投之於巨川，一引而獲太公，再舉而登尙父，由此觀之，蹲會稽而沈槽者，鮑肆之事也；踞滄海而負鼈者，漁父之事也；斯並眇小者之所習，安知大丈夫之所釣哉！

### 祭趙郎將文

惟靈降精辰象，委質昌期。棄筆文場，早徇封侯之志；影纓武帳，坐昇戎秩之榮。屬滇浦擬妖，昆明習戰，應星文而動，將奉天罰以揚威，不能宏妙算於五戎，叶神謀於九變，致令王師失律，兇狡憑陵，嵩穴南臨，同五溪之深入，邛關北阻，類雙嶠之不歸，亭墩多虞，故有負於明代，春秋責帥，豈無愧於幽途，夫任賢與能，明君之事也，陳力就列，忠臣之義也，雖見危授命，固誠節之有餘，臨難權機，何智謀之不足，嗚乎哀哉！某猥以散材，謬專分闢，途經夷落，路踐戎場，停疲驂於九原，悲來有地，痛遺骸於四野，泣下無從，暫輟征旅之勤，爰崇掩骼之義，庶幽靈有托，梧邱息入夢之魂，壯士不還，薤露起送終之曲，嗚乎九真邊徼，萬里長安，城危疏勒，山峻皋蘭，因原爲隴，卽壤成棺，夕陰曠而平蕪晦，秋風急而荒戍寒，嗚乎哀哉！異域幽挺，但

有新栽松柏，他鄉古木，非復舊邑粉榆。感平生其若斯，聊申絮酒，倘聰明之不昧，式薦簞醪。

# 駱丞集卷二

## 五言古詩

### 夏日遊德州贈高四并序

夫在心爲志，發言爲詩。詩有不得盡言，言有不得盡意。僕少負不羈，長途虛澹。讀書頗存涉獵，學劍不待窮工。進不能矯翰龍雲，退不能棲神豹霧。撫循諸己，深覺勞生。而太夫人在堂，義須捧檄。因仰長安而就日，赴帝鄉以望雲。雖文闕三冬，而書勞十上。嗟乎！入門自媚，誰相謂言。致使君門隔於九重，中堂遠於千里。旣而交非得免，路是亡羊。幸嘗敬止，敵廬竭來初服。遂得載披玉葉，款洽金蘭。傾意氣於一言，締風期於千祀。雖交因氣合，資得意以敦交。道契言忘，少寄言而答道。是以輕投木李，以代疎麻。章句繁蕪，心神媿慙。庶瞻雅韻，竚辱報章。則紫耀連星，開龍文於劍匣。素輝虧月，頻驪頷於珠胎。云爾。

日觀鄰全趙，星臨俯舊吳。隔津開巨寢，稽阜鎮名都。紫雲浮劍匣，青山孕寶符。封疆恢竊道，問鼎競雄圖。神光包四大，皇威震八區。風煙通地軸，星象正天樞。天樞限南北，地軸殊鄉國。闢門通舜賓，比屋封堯德。言謝垂鈎隱，來參負鼎職。天子不見知，羣公詎相識。未展從東駿，空戢圖南翼。時命欲何言，撫膺長歎息。歎息將如何，遊人意氣多。白雪梁山曲，寒風易水歌。泣魏傷吳起，思趙切廉頗。淒斷韓王劍，生死翟公羅。



羅悲翟公意，劍負韓王氣。驕餌去易論，忌途良可畏。夙昔懷江海，平生混涇渭。千載契風雲，一言忘賤貴。去去訪林泉，空谷有遺賢。言投爵里刺，來泛野人船。締交君贈編，投分我忘筌。成風郢匠斲，流水伯牙絃。牙絃忘道術，漳濱恣閒逸。聊安張蔚廬，詎掃陳蕃室。虛室狎招尋，敬愛混浮沈。一諾黃金信，三復白珪心。霜松貞雅節，月桂朗沖襟。靈臺萬頃濬，學府九流深。談玄明毀壁，拾紫陋贏金。鷺濤開碧海，鳳彩綴詞林。林虛星華映，水澈霞光淨。霞水兩分紅，川源四望通。霧卷天山靜，煙銷太史空。鳥聲流向薄，蝶影亂芳叢。柳陰低繫水，荷氣上薰風。風月芳菲節，物華紛可悅。將歡促席賞，遽爾又歸別。積水帶吳門，通波連禹穴。贈言雖欲盡，機心庶應絕。潘岳本自閒，梁鴻不因熱。一瓢欣狎道，三月聊棲拙。棲拙隱金華，狎遁訪仙植。放曠愚公谷，消散野人家。一頃南山豆，五色東陵瓜。野衣裁薜葉，山酒酌藤花。白雲離望遠，青溪隱路賒。儻憶幽巖桂，猶冀折疎麻。

在江南贈宋五之問

井絡雙源濬，潯陽九派長。淪波通地穴，輪委下歸塘。別島籠朝蜃，連洲擁夕漲。韞珠澄積澗，讓璧動浮光。浮光疑折水，積澗疎倒泚。玉輪涵地開，劍閣連星起。風煙標迥秀，英靈信多美。懷德踐遺芳，端操慚謀己。謀己謬觀光，牽迹強栖惶。揆拙迷三省，勞生昧兩忘。彈隨空被笑，獻楚自多傷。一朝殊默語，千里易炎涼。炎涼幾遷貿，川陸疲臻湊。積水架吳濤，連山橫楚岫。風月雖殊昔，星河猶是舊。姑蘇望南浦，邯鄲通北走。

北走平生親。南浦別離津。瀟湘一超忽。洞庭多苦辛。秋江無綠芷。寒汀有白蘋。采之將何遺。故人漳水濱。漳濱已遼遠。江潭未旋返。爲聽短歌行。當想長洲苑。露金薰菊岸。風珮搖蘭坂。蟬鳴稻葉秋。鴈起蘆花晚。晚秋雲日明。亭皋風霧清。獨負平生氣。重牽搖落情。占星非聚德。夢月詎懸名。寂寥傷楚奏。淒斷泣秦聲。秦聲懷舊里。楚奏悲無已。郢路少知音。叢臺富奇士。溫輝凌愛日。壯氣驚寒水。一顧重風雲。三冬足文史。文史盛紛綸。京洛多風塵。猶輕五車富。未重一囊貧。李仙非易託。蘇鬼尙難因。不惜勞歌盡。誰爲聽陽春。

詠懷古意上裴侍御

三十二餘罷。鬢是潘安仁。四十九仍入。年非朱買臣。縱橫愁繫越。坎壈倦遊秦。出籠窮短翮。委轍涸枯鱗。窮經不需用。彈鋏欲誰申。天子未驅策。歲月幾沉淪。輕生長慷慨。效死獨殷勤。徒歌易水客。空老渭川人。一得視邊塞。萬里何苦辛。劍匣胡霜影。弓開漢月輪。金刀動秋色。鐵騎想風塵。爲國堅誠款。捐軀忘賤貧。勒功思比憲。決略暗欺陳。若不犯霜雪。虛擲玉京春。

七言古詩

帝京篇

山河千里國。城闕九重門。不覩皇居壯。安知天子尊。皇居帝里峻。函谷鶉野龍山侯。甸服五緯連。影集星躔。八水分流橫地軸。秦塞重關一百二。漢家離宮三十六。桂殿嶽崑對玉樓。椒房窈窕連金屋。三條九陌

麗城隈。萬戶千門。一旦開。複道斜通。鳩鵲觀。交衢直指。鳳凰臺。劍履南宮入。簪纓北闕來。聲名冠寰宇。文物象昭回。鈎陳肅蘭。凡壁沼浮槐。市銅羽應風。回金莖承露起。校文天祿閣。習戰昆明水。朱邸抗平臺。黃扉通戚里。平臺戚里帶崇墉。炊金饌玉待鳴鐘。小堂綺帳三千戶。大道青樓十二重。寶蓋雕鞍金絡馬。蘭窗繡柱玉盤龍。繡柱璇題粉壁映。鏘金鳴玉王侯盛。王侯貴人多近臣。朝遊北里暮南鄰。陸賈分金將讌喜。陳遵投轄正留賓。趙李經過密。蕭朱交結親。丹鳳朱城白日暮。青牛紺轡紅塵度。俠客珠彈垂楊道。娼婦銀鈎采桑路。娼家桃李自芳菲。京華游俠盛輕肥。延年女弟雙鳳入。羅敷使君千騎歸。同心結縷帶。連理織成衣。春朝桂樽樽百味。秋夜蘭燈燈九微。翠幌珠簾不獨映。清歌寶瑟自相依。且論三萬六千是。寧知四十九年非。古來榮利若浮雲。人生倚伏信難分。始見田竇相移奪。俄聞衛霍有功勳。未厭金陵氣。先開石槨文。朱門無復張公子。灞亭誰畏李將軍。相顧百齡皆有待。居然萬化咸應改。桂枝芳氣已銷亡。柏梁高宴今何在。春去春來若自馳。爭名爭利徒爾爲。久留郎署終難遇。空埽相門誰見知。當時一旦擅豪華。自言千載長驕奢。倏忽搏風生羽翼。須臾失浪委泥沙。黃雀徒巢桂。青門遂種瓜。黃金銷鑠素絲變。一貴一賤交情見。紅顏宿昔白頭新。脫粟布衣輕故人。故人有湮淪。新知無意氣。灰死韓安國。羅傷翟廷尉。已矣哉。歸去來。馬卿辭蜀多文藻。楊雄仕漢乏良媒。三冬自矜成足用。十年不調繼遭迴。汲黯薪逾積。孫弘閣未開。誰惜長沙傅。獨負洛陽才。

疇昔篇

少年重英俠，弱歲賤衣冠。既託寰中賞，方承膝下歡。遨遊灞水曲，風月洛城端。且知無玉饌，誰肯逐金丸。金丸玉饌盛繁華，自言輕侮季倫家。五霸爭馳千里馬，三條競駕七香車。掩映飛軒乘落照，參差步障引朝霞。池中舊水如懸鏡，屋裏新粧不讓花。意氣風雲倏如昨，歲月春秋屢迴薄。上苑頻經柳絮飛，中園幾見梅花落。當時門客今何在，疇昔交朋已疎索。莫教憔悴損容儀，會得高秋雲霧廓。淹留坐帝鄉，無事積炎涼。一朝披短褐，六載奉長廊。賦文慙昔馬，執戟嘆前揚。揮戈出武帳，荷筆入文昌。文昌隱隱皇城裏，由來奕奕多才子。潘陸詞鋒駱驛飛，張曹翰苑縱橫起。卿相未曾識，王侯寧見擬。垂釣甘成白首翁，負薪何處逢知己。判將運命賦窮通，從來奇舛任西東。不應永棄同芻狗，且復飄飄類轉蓬。容鬢年年異，春華歲歲同。榮親未盡禮，徇主欲申功。脂車秣馬辭鄉國，綦轡西南使印璽。玉壘銅梁不易攀，地角天涯眇難測。鴛鴦轉蟬吟，有悲望。鴻來鴈度無音息，陽關積霧萬里昏。劍閣連山千種色，蜀路何悠悠。岷峯阻且脩，迴腸隨九折。迸淚連雙流，寒光千里暮。露氣一江秋，長途看束馬。平水且沈牛，華陽舊地標神制。石鏡娥眉真秀麗，諸葛才雄已號龍。公孫躍馬輕稱帝，五丁卓犖多奇力。四士英靈富文藝，雲氣橫開八陣形。橋影遙分七星勢，川平煙霧開。遊戲錦城隈，墉高龜望出。水淨鴈文回，尋姝入酒肆。訪客上琴臺，不識金貂重。偏惜玉山頽，他鄉冉冉消年月。帝里沈沈限城闕，不見猿聲助客啼。唯聞旅思將花發，我家迢遞關山裏。關

山迢遞不可越。故園梅柳尙餘春。來時勿使芳菲歇。解鞅欲言歸。執袂愴多違。北梁俱握手。南浦共沾衣。別情傷去蓋。離念惜光輝。知音何所託。木落鴈南飛。回來望平陸。春來酒應熟。相將菌閣臥青溪。且用藤杯汎黃菊。十年不調爲貧賤。百日屢遷隨倚伏。祇爲須求負郭田。使我再干州縣祿。百年鬱鬱少騰遷。萬里遙遙入鏡川。淡江拂潮衝白日。淮海長波接遠天。叢竹凝朝露。孤山起暝煙。賴有邊城月。常伴客旌懸。東南美箭稱吳會。名都隱軫三江外。塗山執玉應昌期。曲水開襟重文會。仙鏑流音鳴鶴嶺。寶劍分輝落蛟瀨。未看白馬對蘆芻。且覺浮雲似車蓋。江南節序多。文酒屢經過。共踏春江曲。俱唱采菱歌。舟移疑入鏡。棹舉若乘波。風光無限極。歸櫂礙池荷。眺聽煙霞正。流眄卽從王事歸。艤轉芝田花。月屢徘徊。金谷佳期重游衍。登高北望嗤梁叟。憑軾西征想潘掾。岸開華岳聳疑蓮。水激龍門急如箭。人事謝光陰。俄遭霜露侵。偷存七尺影。分沒九泉深。窮途行泣玉。憤路未藏金。茹荼空有歎。懷橘獨傷心。年來歲去成銷鑠。懷抱心期漸寥落。桂冠裂冕已辭榮。南畝東臯事耕鑿。賓階客院常疎散。蓬徑柴扉終寂寞。自有林泉堪隱棲。何必山中事丘壑。我住青門外。家臨素澹濱。遙瞻丹鳳闕。斜望黑龍津。荒衢通獵騎。窮巷抵樵輪。時有桃源客。來訪竹林人。昨夜琴聲奏悲調。旭旦含顰不成笑。果乘驄馬發蠶書。復追郎官稟綸誥。治長非罪會縲紲。長孺然灰也經溺。高門有閤不圖封。峻筆無聞斂敷妙。適離京兆謗。還從御史彈。炎威資夏景。平曲況秋翰。晝地終難入。書空自不安。吹毛未可待。搖尾且求餐。丈夫坎壈多怨疾。契闊連遭盡今日。慎罰

寧憑兩造辭。嚴科直掛三章律。鄒衍銜悲繫燕獄。李斯抱怨拘秦柱。不應白髮頓成絲。直爲黃沙暗如漆。紫禁終難叫。朱門不易排。驚魂聞葉落。危魄逐輪埋。霜威遙有勵。雪杜遂無階。含冤欲誑道。飲氣獨居懷。忽聞驛使發。關東傳道天波萬里通。涸鱗去轍先遊海。幽禽釋網便翔空。舜澤堯曦方有極。讒言巧佞儻無窮。誰能跼踖依三輔。會就商山訪四翁。

行軍軍中行路難

君不見封狐雄虺自成羣。憑深負固結妖氛。玉璽分兵徵惡少。金壇受律勳將軍。將軍擁旄宣廟略。戰士橫行靜夷落。長驅一息背銅梁。直指三危登劍閣。閣道迢迢起戍樓。劍門遙裔俯靈丘。叩關九折無平路。江水雙源有急流。征役無期返。他鄉歲月晚。杳杳丘陵出。蒼蒼林薄遠。途危紫蓋峯。路澁青泥坂。去去指哀牢。行行入不毛。絕壁千里險。連山四望高。中外分區宇。夷夏殊風土。交趾枕南荒。昆彌臨北戶。川原繞毒霧。谿谷多淫雨。行潦四時流。崩崖千歲古。漂梗飛蓬不自安。捫藤引葛度危巒。昔時聞道從軍樂。今日方知行路難。滄江綠水東流駛。炎州丹徼南中地。南中南斗映星河。秦關秦塞阻烟波。三春邊地風光少。五月瀘川瘴癘多。朝驅疲斥堠。夕息倦樵歌。向月鬱繁弱。連星轉太阿。重義輕生懷一顧。東征西伐凡幾度。夜夜朝朝斑鬢新。年年歲歲戎衣故。灞城隅。滇池水。天涯望轉積。地際行無已。徒覺炎涼節物非。不知關山千萬里。乘置勿重陳。征行多苦辛。且悅清笳楊柳曲。詎憶芳園桃李人。絳節紅旗分白羽。丹心白刃

酬明主。但令一被君王知。誰憚三邊征戰苦。行路難。幾千端。無復歸雲憑短翰。空餘望日想長安。

行路難

君不見玉關塵色暗邊庭。銅鞮雜虜寇長城。天子按劍徵餘勇。將軍受賑事橫行。七德龍韜開玉帳。千里鼙鼓疊金鉦。陰山苦霧埋高壘。交河孤月照連營。連營去去無窮極。擁旆遙遙過絕國。陣雲朝結晦天山。寒沙夕漲迷疎勒。龍鱗水上開魚貫。馬首山前振鷗翼。長驅萬里響祁連。分麾三命武功宣。百發烏號遙碎柳。七尺龍文迴照蓮。春去秋來移灰琯。蘭閨柳市芳塵斷。鴈門迢遞尺書稀。鴛被相思雙帶緩。行路難。行路難。誓令氛祲靜皋蘭。但使封侯龍領貴。詎隨中婦鳳樓寒。

監情代郭氏答盧照鄰

迢迢芊路望芝田。眇眇函關恨蜀川。歸雲已落涪江外。還鴈應過洛水邊。洛水傍連帝城側。帝宅層甍垂鳳翼。銅駝路上柳千條。金谷園中花幾色。柳葉園花處處新。洛陽桃李應芳春。妾向雙流窺石鏡。君住三川守玉人。此時離別那堪道。此日空牀對芳沼。芳沼徒遊比目魚。幽徑還生拔心草。流風迴雪儻便娟。驥子魚文實可憐。擲果河陽君有分。貨酒成都妾亦然。莫言貧賤無人重。莫言富貴應須柳。綠珠猶得石崇憐。飛燕曾經漢皇寵。良人何處醉縱橫。直如循默守空名。倒提新綠成慊慊。翻將故劍作平平。離前吉夢成蘭兆。別後啼痕上竹生。別日分明相約束。已取宜家成誠勗。當時擬弄掌中珠。豈謂先摧庭際玉。悲鳴

五里無人問腸斷三聲誰爲續。思君欲上望夫臺。端居懶聽將離曲。沉沉落日向山低。簷前歸燕並頭棲。抱膝當窗看夕兔。側耳空房聽曉雞。舞蝶臨階祇自舞。啼鳥逢人亦助啼。獨坐傷孤枕。春來悲更甚。峨眉山上月如眉。濯錦江中霞似錦。錦字迴文欲贈君。劍壁層峯自糾紛。平江淼淼分青浦。長路悠悠開白雲。也知京洛多佳麗。也知山岫遙虧蔽。無那短封卽疎索。不在長情守期契。傳聞織女對牽牛。相望重河隔淺流。誰分迢迢經兩歲。誰能脈脈待三秋。情知唾井終無理。情知覆水也難收。不復下山能借問。更向盧家字莫愁。

代女道士王靈妃贈道士李榮

玄都五府風塵絕。碧海三山波浪深。桃實千年非易待。桑田一變已難尋。別有仙居對三市。金闕銀宮相向起。臺前鏡影伴仙娥。樓上簫聲隨鳳史。鳳樓迢遞絕塵埃。鸞時物色正徘徊。靈芝紫檢參差長。仙桂丹花重疊開。雙童綽約時遊陟。三鳥聯翩報消息。盡言真侶出遨遊。傳道風光無限極。輕花委砌惹裾香。殘月窺牕覘幌色。箇時無數併妖妍。箇裏無窮總可憐。別有衆中稱黜帝。天上人閒少流例。洛濱仙駕啓遙源。淮浦靈津符遠筮。自言少小慕幽玄。只言容易得神仙。佩中邀勒經時序。簫裏尋思復幾年。尋思許事真情變。二八容華識少選。漫道燒丹止七飛。空傳化石曾三轉。寄語天上弄機人。寄語河邊值楫客。乍可恩恩共百年。誰使遙遙期七夕。想知人意自相尋。果得深心共一心。一心一意無窮已。投漆投膠非足擬。



只將羞澁富風流。持此相憐保終始。相憐相念倍相親。一生一代一雙人。不把丹心比玄石。惟將濁水況清塵。只言柱下留期信。好欲將心學松籟。不能京兆畫蛾眉。翻向成都聘騶引。青牛紫氣度靈關。尺素絕鱗去不還。連苔上砌無窮綠。脩竹臨壇幾處斑。此時空牀難獨守。此日別離那可久。梅花如雪柳如絲。年去年來不自持。初言別在寒偏在。何悟春來春更思。春時物色無端緒。雙枕孤眠誰分許。分念嬌鶯一種啼。生憎燕子千般語。朝雲旭日照青樓。遲暉麗色滿皇州。落花泛泛浮靈沼。垂柳長長拂御溝。御溝大道多奇賞。俠客妖容遞來往。寶騎連花鐵作錢。香輪驚水珠爲網。香輪寶騎競繁華。可憐今夜宿娼家。鸚鵡杯中浮竹葉。鳳凰琴裏落梅花。許叢多情偏送款。爲問春花幾時滿。千回鳥信說衆諸。白過鶯啼說長短。長短衆諸判不尋。千回百過浪關心。何曾舉意西鄰玉。未肯留情南陌金。南陌西鄰咸自保。還憐歸期須及早。爲想三春狹斜路。莫辭九折卍關道。假令白里似長安。應使青牛學劍端。蘋風入馭來應易。竹杖成龍去不難。龍隨去去無消息。鸞鏡朝朝減容色。君心不記下山人。妾欲空期上林翼。上林三月鴻欲稀。葦表千年鶴未歸。不分淹留桑路待。祇應直取桂輪飛。

## 駱丞集卷二

### 五言律詩

#### 在獄詠蟬并序

余禁所。禁垣西。是法廳事也。有古槐數株焉。雖生意可知。同殷仲文之古樹。而聽訟斯在。卽周召伯之甘棠。每至夕照低陰。秋蟬疎引。發聲幽息。有切嘗聞。豈人心異於曩時。將蟲響悲於前聽。嗟乎。聲以動容。德以象賢。故潔其身也。稟君子達人之高行。蛻其皮也。有仙都羽化之靈姿。候時而來。順陰陽之數。應節爲變。審藏用之機。有目斯開。不以道昏而昧其視。有翼自薄。不以俗厚而易其真。吟喬樹之微風。韻資天縱。飲高秋之墜露。清畏人知。僕失路艱虞。遭時徽纆。不哀傷而自怨。未搖落而先衰。聞蟋蟀之流聲。悟平反之已奏。見螳螂之抱影。怯危機之未安。感而綴詩。貽諸知己。庶情沿物應。哀弱羽之飄零。道寄人知。憫餘聲之寂寞。非謂文墨。取代幽憂云爾。

西陸蟬聲唱。南冠客思侵。那堪玄鬢影。來對白頭吟。露重飛難進。風多響易沈。無人信高潔。誰爲表予心。

遊紫雲觀贈道士并序。

余鄉國一辭。江山萬里。昔年離別。還同塞北之鳧。今日歸來。卽似遼東之鶴。先生情均得免。忘筌之契已

深路是亡羊，分歧之恨逾切。不題短什，何汰衷袷。

碧落澄秋景，玄門啓曙關。人疑列禦至，客似令威還。羽蓋徒忻仰，雲車未可攀。只應傾玉體，時許寄頽顏。

渡瓜步江

捧檄辭幽徑，鳴榔下貴洲。驚濤疑躍馬，積氣似連牛。月迴寒沙淨，風急夜江秋。不學浮雲影，他鄉空滯留。

途中有懷

瞻然懷楚奏，悵矣背秦關。涸鱗驚照轍，墜羽怯虛彎。素服三川化，烏裘十上還。莫言無皓齒，時俗薄朱顏。

至分水戍

行役忽離憂，復此愴分流。澗石迴湍咽，縈叢曲澗幽。陰崖常結晦，宿莽競含秋。況乃霜晨早，寒風入戍樓。

望鄉夕泛

歸懷剩不安，促榜犯風瀾。落宿舍樓近，浮月帶江寒。喜逐行前至，憂從望裏寬。今夜南枝鵲，應無繞樹難。

久客臨海有懷

天涯非日觀，地紀望星樓。練光搖亂馬，劍氣上連牛。草濕姑蘇夕，葉下洞庭秋。欲知悽斷意，江上涉安流。

遊竟部逢孔君自衛來欣然相遇若舊

遊人自衛返，背客隔淮來。傾蓋金蘭合，忘筌玉葉開。繁花明日柳，疎蕊落風梅。將期重交態，時慰不然灰。

西京守歲

閒居寡言晏，獨坐慘風塵。忽見嚴冬盡，方知列宿春。夜將寒色去，年共曉光新。耿耿他鄉夕，無由展舊親。

白雲抱幽石

重巖抱危石，幽澗曳輕雲。繞鎮仙衣動，飄蓬羽蓋分。錦色連花靜，苔光帶葉薰。詎知吳會影，長抱穀城文。

春雲處處生

千里年光靜，四望春雲生。暫日祥光舉，疎雲瑞葉輕。蓋陰籠迴樹，陣影抱危城。非將吳會遠，飄蕩帝鄉情。

同辛簿簡仰酬思玄上人林泉四首

聞君招隱地，髣髴武陵春。緝芟知還楚，披榛似避秦。崩查年祀積，幽草歲時新。一謝滄浪水，安知有逸人。

其二

芳晨臨上月，幽賞狎中園。有蝶堪成夢，無羊可觸藩。忘懷南澗藻，觸思北堂萱。坐歎華滋歇，思君誰爲言。

其三

林泉恣探歷，風景暫徘徊。客有遷鶯處，人無結驕來。聚花如薄雪，沸水若輕雷。今日徒招隱，終知異鷲坯。

其四

俗遠風塵隔，春還初服遲。林疑中散地，人似上皇時。芳杜湘君曲，幽蘭楚客詞。山中有春草，長似寄相思。

秋日送陳文林陸道士

青牛遊華岳，赤馬走吳宮。玉柱離鴻怨，金罍浮蟻空。日霽峽陵雨，塵起洛陽風。唯當玄度月，千里與君同。

送鄭少府入遼

邊烽警榆塞，俠客度桑乾。柳葉開銀鑷，桃花照玉鞍。滿月臨弓影，連星入劍端。不學燕丹客，空歌易水寒。

送費六還蜀

星樓望蜀道，月峽指吳門。萬行流別淚，九折切驚魂。雪影含花落，雲陰帶葉昏。還愁三徑晚，獨對一清尊。

秋日送侯四

我留安豹隱，君去學鵬搏。歧路分襟易，風雲促膝難。夕漲流波急，秋山落日寒。惟有思歸引，悽斷爲君彈。

秋日送尹大赴京

掛瓢余隱舜，負鼎爾干湯。竹葉離樽滿，桃花別路長。低河耿秋色，落月抱寒光。素書如可嗣，幽谷竚賓行。

秋夜送閻五

通莊抵舊里，溝水泣新知。斷雲飄易滯，連露積難披。素風啼迴壑，驚月繞疎枝。無力勵短翰，輕舉送長離。

送王明府上京參選

振衣遊紫府，飛蓋背青田。虛心恆警露，孤影尙凌煙。離歌悽妙曲，別操繞繁弦。在陰如可和，清響會聞天。

秋日送別

寂寥心事晚，搖落歲時秋。共此傷華髮，相看惜去留。當歌應破涕，哀命返窮愁。別後能相憶，東陵有故侯。

別李嶠

芳尊徒自滿，別恨轉難勝。客似遊江岸，人疑上灞陵。寒更承夜永，涼景向秋澄。離心何以贈，自有玉壺冰。

在兗州餞宋五之問

淮沂泗水地，梁甫汶陽東。別路青驪遠，離尊綠蟻空。柳寒凋密翠，棠晚落疎紅。別後相思曲，淒斷入琴風。

遊靈公觀

靈峯標勝境，神府枕通川。玉殿斜連漢，金堂迴架煙。斷風疎晚竹，流水切危絃。別有青門外，空懷玄圃仙。

夏日遊山家同夏少府

返照下層岑，物外狎招尋。蘭徑薰幽珮，槐庭落暗金。谷靜風聲徹，山空月色深。一遺樊籠累，唯餘松桂心。

初秋登王司馬樓宴

展驥端居暇，登龍喜宴同。絳賞三清滿，承歡六義通。野晦寒陰積，潭虛夕照空。顧慚非夢鳥，濫此廁雕蟲。

初秋於賈六郎宅宴

千里風雲契，一朝心賞同。意盡深交合，神靈俗累空。草帶銷寒翠，花枝發夜紅。唯將淡若水，長揖古人風。

冬日宴

二三物外友，一百杖頭錢。賞洽袁公地，情披樂令天。促席鸞觴滿，當爐獸炭然。何須攀桂樹，逢此自留連。

鏤鷄子

幸遇清明節，欣逢舊練人。刻花爭臉態，寫月競眉新。暈罷空餘月，詩成併道春。誰知懷王者，含響未吟晨。

詠雲酒

朔空曾紀歷，帶地舊疏泉。色泛臨碣瑞，香流赴蜀仙。款交欣散玉，洽友悅沉錢。無復中山賞，空吟吳會篇。

詠美人在天津橋

美女出東鄰，容與上天津。整衣香滿路，移步機生塵。水下看粧影，眉頭畫月新。寄言曹子建，箇是洛川神。

憲臺出紮寒夜有懷

獨坐懷明發，長謠苦未安。自應迷北叟，誰肯問南冠。生死交情異，殷憂歲序闌。空餘朝夕鳥，相伴夜啼寒。

送郭少府

開筵枕德水，輟棹艤仙舟。貝闕桃花浪，龍門竹箭流。當歌悽別曲，對酒泣離憂。還望青門外，空見白雲浮。

餞駱四二首

平生何以樂，斗酒夜相逢。曲中驚別緒，醉裏失愁容。星月懸秋漢，風香入曙鐘。明日臨溝水，青山幾萬里。

其二

甲第驅車入，良宵秉燭遊。人追竹林會，酒獻菊花秋。霜吹飄無已，星河漫不流。重嗟歡賞地，翻召別離憂。冬日過故人任處士書齋

神交尙投漆，虛室罷遊蘭。網積窗文亂，苔深履迹殘。雪明書帳冷，冰靜墨池寒。獨此琴臺夜，流水爲誰彈。塵灰

洛川流雅韻，秦道擅苛威。聽歌梁上動，應律管中飛。光飄神女襪，影落羽人衣。願言心未翳，終冀效輕微。

秋晨同淄川毛司馬秋色九詠 秋風

紫陌炎氛歇，青蘋晚吹浮。亂竹搖疎影，縈池織細流。飄香曳舞袖，帶粉泛粧樓。不分君恩絕，紈扇曲中秋。

秋雲

南陸銅渾改，西郊玉葉輕。泛斗瑤光動，臨陽瑞色明。蓋陰連鳳闕，陣影翼龍城。誰知時不遇，空傷流滯情。

秋蟬

九秋行已暮，一枝聊暫安。隱榆非諫楚，噪柳異悲潘。分形粧薄鬢，鏤貌飾危冠。自憐疎影斷，霜林夕吹寒。

秋露

玉關寒氣早，金塘秋色歸。泛掌光逾淨，添荷滴尙微。變霜凝曉液，承月委圓輝。別有吳臺上，應濕楚臣衣。



秋月

雲披玉繩淨，月滿鏡輪圓。露珠暉冷，凌霜桂影寒。漏彩含疎薄，浮光漾急瀾。西園徒自賞，南飛終未安。

秋水

金闕寒流徹，玉輪秋浪清。圖雲錦色淨，寫月練花明。泛曲鷗絃動，隨軒鳳轄驚。唯當御溝上，悽斷送歸情。

秋螢

玉虬分靜夜，金螢照晚涼。含輝疑泛月，帶火怯凌霜。散彩縈虛牖，飄花繞洞房。下帷如不倦，當解惜餘光。

秋菊

擢秀三秋晚，開芳十步中。分黃俱笑日，含翠共搖風。碎影涵流動，浮香隔岸通。金翹徒可泛，玉墀竟誰同。

秋鴈

聯翩辭海曲，遙曳指江干。陣去金河冷，書歸玉塞寒。帶月凌空易，迷煙逗浦難。何當同顧影，刷羽泛清瀾。

詠水

列名通地紀，疏派合天津。波隨月色淨，態逐桃花春。照霞如隱石，映柳似沉鱗。終當挹上善，屬意淡交人。

詠鴈

唼藻滄江遠，銜蘆紫塞長。霧深迷曉景，風急斷秋行。陣照通宵月，書封幾夜霜。無復能鳴分，空知愧稻梁。

詠雪

龍雲玉葉上，鶴雪瑞花新。  
影亂銅烏吹，光銷玉馬津。  
含輝明素篆，隱迹表祥輪。  
幽蘭不可儷，徒自繞陽春。

王昭君

斂容辭豹尾，緘怨度龍鱗。  
金鈿明漢月，玉筯染胡塵。  
古鏡菱花暗，愁眉柳葉顰。  
唯有清笳曲，時聞芳樹春。

樂大夫挽詞五首

可歎浮生促，吁嗟此路難。  
丘陵一起恨，言笑幾時歡。  
蕭索郊埏晚，荒涼井徑寒。  
誰當門下客，獨見有任安。

其二

蒿里誰家地，松門何代丘。  
百年三萬日，一別幾千秋。  
返照寒無影，窮泉凍不流。  
居然同物化，何處欲藏舟。

其三

昔去梅笳發，今來薤露晞。  
彤騎朝帝闕，丹旆背王畿。  
城郭猶疑是，園陵稍覺非。  
九原如可作，千載與誰歸。

其四

一旦先朝菌，千秋掩夜臺。  
青烏新兆去，白馬故人來。  
草露當春泣，松風向暮哀。  
寧知荒隴外，弔鶴自徘徊。

其五

忽見泉臺路，猶疑水鏡懸。  
何如開白月，非復覩青天。  
華表迎千歲，幽局送百年。  
獨嗟流水引，長掩伯牙絃。

丹陽刺史挽詞三首

百齡嗟倏忽，一旦向山阿。丹桂銷已盡，青松良更多。薰風虛聽曲，薤露反成歌。自有藏舟處，誰憐隙駒過。

其二

側館恆山羽，留連棣萼篇。佳城非舊日，京兆卽新阡。城郭三千歲，丘陵幾萬年。唯餘松柏隴，朝夕起寒煙。

其三

短歌三獻曲，長夜九泉臺。此室玄扃掩，何年白日開。荒郊疎古木，寒隧積陳蓂。獨此傷心地，松聲薄暮來。

送劉少府遊越州

一丘余枕石，三越爾懷鉉。離亭分鶴蓋，別岸指龍川。露下蟬聲斷，寒來鴈影連。如何清水上，悽悽聽離弦。

從軍行

平生一顧重，意氣溢三軍。野日分戈影，天星合劍文。弓絃抱漢月，馬足踐胡塵。不求生入塞，惟當死報君。

稱心寺

征帆恣遠尋，逶迤過稱心。凝滯蘅蕙岸，沿洄橘柚林。穿溆厭不曲，躡潭唯愛深。爲樂凡幾許，聽取舟中琴。

陪潤州薛司空丹徒桂明府遊招隱寺

其尋招隱寺，初識戴顓家。還依舊泉壑，應改昔雲霞。綠竹寒天笋，紅蕉臘月花。金繩倘留客，爲繫日光斜。

出石門

層巖遠接天，絕嶺上棲煙。松低輕蓋偃，藤細弱絲懸。石明如掛鏡，苔分似列錢。暫策爲龍杖，何處得神仙。  
至分陝

陝西開勝壤，召南分沃疇。列樹巢維鶻，平渚下雌鳩。憩棠疑勿剪，曳葛似攀樛。至今王化美，非獨在隆周。  
北眺春陵

攬轡疲宵邁，驅馬倦晨興。既出封泥谷，還過避雨陵。山行明照上，谿宿密雲蒸。登高徒欲賦，詞殫獨撫膺。  
夏日遊目聊作

暫屏鷲塵累，言尋物外情。致逸心逾默，神幽體自輕。浦夏荷香滿，田秋麥氣清。詎假滄浪上，將濯楚臣纓。  
同崔駙馬曉初登樓思京

麗譙通四望，繁憂起萬端。綺疏低晚魄，鏤檻肅初寒。白雲鄉思遠，黃圖歸路難。唯餘西向笑，暫似當長安。  
月夜有懷簡諸同病

閒庭落景盡，疎簾夜月通。山靈響似應，水淨望如空。棲枝猶繞鶴，遵渚未來鴻。可歎高樓婦，悲思杳難終。  
春夜韋明府宅宴

酌桂陶芳夜，披薜嘯幽人。雅琴馴魯雉，清歌落范塵。宿雲低迴蓋，殘月上虛輪。幸此承恩洽，聊當故鄉春。

送宋五之間得涼字

願言游泗水，支離去二漳。道術君所篤，筌蹄余自忘。雪威侵竹冷，秋爽帶池涼。欲驗離襟切，歧路在他鄉。

# 駱丞集卷四

## 五言排律

### 浮槎井序

遊目川上，觀一浮槎。泛泛然若木偶之乘流，迷不知其所適也。觀其根柢盤屈，枝幹扶疎。大則有棟梁舟楫之材，小則有輪轅榘桷之用。非夫稟乾坤之秀氣，含宇宙之瀉精，孰能負凌雲槩日之姿，抱積雪封霜之骨。向使懷材幽藪，藏穎重嶠，絕望於廊廟之榮，遺形於斤斧之患，固可垂蔭萬畝，懸映九霄。與建木較其短長，將大椿齊其年壽者，而委根險岸，託質畏塗。上爲疾風衝颺，所摧殘；下爲奔浪迅波，所激射。基由壤括，勢以地危。豈盛衰之理繫乎時，封植之道存乎我。一墜泉谷，萬里飄淪。與波浮沉，隨時逝止。雖殷仲文歎生意已盡，孔宣父知朽質難雕。然而遇良工，逢仙客，牛礪可託，玉璜之路非遙。匠石先談，萬乘之器何遠。故材用與不用，時也。悲夫！然知萬物之相應感者，亦奚必同聲同氣而已哉。感而賦詩，貽諸同疾云爾。昔負千尋質，高臨九仞峯。貞心凌晚桂，勁節掩寒松。忽值風飈折，坐爲波浪衝。摧殘空有恨，擁腫遂無庸。渤海三千里，泥沙幾萬重。似舟飄不定，如梗泛何從。仙客終難託，良工豈易逢。徒懷萬乘器，誰爲一先容。

春霽早行

年華開早律，霽色蕩芳晨。城闕千門曉，山河四望春。御溝通太液，戚里對平津。寶瑟調中婦，金轡引上賓。劇談推曼倩，驚座揖陳遵。意氣一言合，風期萬里親。自惟安直道，守拙忌因人。談器非先木，圖榮異後薪。擲揄慚路鬼，憔悴切波臣。玄草終疲漢，烏裘幾滯秦。生涯無歲月，歧路有風塵。還嗟太行道，處處白頭新。

晚度天山有懷京邑

忽上天山路，依然想物華。雲疑上苑葉，雪似御溝花。行嘆戎麾遠，坐憐衣帶賒。交河浮絕塞，弱水浸流沙。旅思徒漂梗，歸期未及瓜。寧知心斷絕，夜夜泣胡笳。

晚泊河曲

三秋倦行役，千里泛歸潮。通波竹箭水，輕舸木蘭橈。金隄連曲岸，貝闕影浮橋。水淨千年近，星飛五老遙。疊花開宿浪，浮葉下涼飈。浦荷疎晚的，津柳漬寒條。恹惶勞梗泛，悽斷倦蓬飄。仙□不可託，河上獨長謠。

晚泊蒲類津

二庭歸望斷，萬里客心愁。山路猶南屬，河源自北流。晚風連朔氣，新月照邊秋。竈火通軍壁，烽煙上戍樓。龍庭但苦戰，燕頷會封侯。莫作蘭山下，空令漢國羞。

早發淮口望盱眙

養蒙分四瀆，習坎奠三荆。徒帝留餘地，封王表舊城。岸昏涵蜃氣，潮滿應鷄聲。洲迴連沙靜，川虛積溜明。一朝從捧檄，千里倦懸旌。背流桐柏遠，逗浦木蘭輕。小山迷隱路，大塊切勞生。唯有貞心在，獨映寒潭清。遠使海曲春夜多懷。

長嘯三春晚，端居百慮盈。未安蝴蝶夢，遽切魯禽情。別島連寰海，離魂斷戍城。流星疑作使，低月似依營。懷祿寧期達，牽時匪狗名。艱虞行已遠，時迹自相驚。

早發諸暨

征夫懷遠路，夙駕上危巒。薄煙橫絕巘，輕凍澁迴湍。野霧連空暗，山風入曙寒。帝城臨滌滌，禹穴枕江干。橘性行應化，蓬心去不安。獨掩窮途淚，長歌行路難。

過張平子墓

西鄂該通理，南陽擅德音。玉卮浮藻麗，銅渾積思深。忽懷今日昔，非復昔時今。日落豐碑暗，風來古木吟。惟歎窮泉下，終鬱羨魚心。

海曲書情

薄遊倦千里，勞生負百年。未能查上漢，詎肯劍遊燕。白雲照春海，青山橫曙天。江濤讓雙壁，渭水擲三錢。坐惜風光晚，長歌獨塊然。



邊城落日

紫塞流沙北，黃圖灞水東。一朝辭俎豆，萬里逐沙蓬。候月恆持滿，尋源屢鑿空。野昏邊氣合，烽迴戍煙通。臂力風塵倦，疆場歲月窮。河流控積石，山路遠崆峒。壯志凌蒼兕，誠精貫白虹。君恩如可報，龍劍有雌雄。

蓬萊鎮

旅客春心斷，邊城夜望高。野樓疑海氣，白鷺似江濤。結綬疲三入，承冠泣二毛。將飛憐弱羽，欲濟乏輕舠。賴有陽春曲，窮愁且代勞。

宿溫城望軍營

虜地寒膠折，邊城夜柝聞。兵符關帝闕，天策動將軍。塞靜胡笳徹，沙明楚練分。風旗翻翼影，霜劍轉龍文。白羽搖如月，青山斷若雲。煙疎疑卷幔，塵滅似銷氛。投筆懷班業，臨戎想顧勳。還應雪漢恥，持此報明君。

和孫長史秋日臥病

霍第疎天府，潘園近帝臺。調絃三婦至，置驛五侯來。尙想歡娛洽，吁嗟歲月催。金壇分上將，玉帳引瓊材。決勝鯨波靜，騰謀鳥谷開。白雲淮水外，紫陌灞陵隈。節變驚衰柳，笳繁思落梅。調神和玉燭，挾藻握珠胎。悵矣欣懷土，居然欲死灰。還因承雅曲，暫喜躍沉鯨。

四月八日題七級

化城分鳥堞，香閣俯龍川。複棟侵黃道，重簷架紫煙。銘書非晉代，壁畫是梁年。霸略今何在，王宮尚巋然。二帝曾遊聖，三卿是偶賢。因茲遊勝侶，超彼託良緣。我出有爲界，君登非想天。悠悠青曠裏，蕩蕩白雲前。今日經行處，曲音號蓋煙。

早秋出塞寄東臺詳政學士

促駕逾三水，長驅望五原。天街分斗極，地理接樓煩。溪月明關隴，戎雲聚塞垣。山川殊物候，風壤異涼溫。戍古秋塵合，沙寒宿霧繁。昔余迷學步，投迹忝詞源。蘭渚浮延閣，蓬山款禁園。影纓陪紱冕，載筆偶瑱璠。汲冢寧詳蠹，秦牢詎辨冤。一朝從篋服，千里駕輕軒。鄉夢隨魂斷，邊聲入聽喧。南圖終鍛翮，北上遽摧轡。弔影慚連茹，浮生倦觸藩。數奇何以託，桃李自無言。

郟安陽入蜀

彭山折坂外，井絡少城隈。地是三巴俗，人非百里才。畏途君悵望，歧路我徘徊。心賞風煙隔，容華歲月催。遙遙分鳳野，去去轉龍媒。遺錦非前邑，鳴琴卽舊臺。劍門千仞起，石路五丁開。海客乘槎渡，仙童馭竹回。魂將離鶴遠，思逐斷猿哀。唯有鸞鳧鳥，飛去復飛來。

在軍中贈先還知己

蓬轉俱行役，瓜時獨未還。魂迷金闕路，望斷玉門關。獻凱多慙衮，論封幾謝班。風塵催白首，歲月損紅顏。

落鳴低秋塞，驚鳥起暝灣。胡霜如劍鏑，漢月似刀環。別後邊庭樹，相思幾度攀。

和李明府

傳聞葉縣履，飛向洛陽城。馳道臨層掖，津門對小平。霞殘疑製錦，雲度似懸纓。藻挾潘江敵，塵虛范甑清。詎憐衝斗氣，猶向匣中鳴。

望月有所思

九秋涼風肅，千里月華開。圓光隨露滿，碎影逐波來。似霜明玉砌，如鏡寫珠胎。晚色依關近，邊聲雜吹哀。離居分照耀，怨緒共徘徊。自繞南飛羽，空忝北堂才。

送吳七遊蜀

日觀分齊壤，星橋接蜀門。桃花嘶別路，竹葉瀉離樽。夏老蘭猶茂，秋深柳尚繁。霧銷山望迥，風高野聽喧。勞歌徒欲奏，贈別竟無言。唯有當秋月，空照野人園。

西行別東臺詳政學士

意氣坐相親，關河別故人。客似秦川上，歌疑易水濱。寒荒行辨玉，臺遠尚名輪。洩井懷邊將，尋源重漢臣。上苑梅花早，御溝楊柳新。只應持此曲，別作邊城春。

春晚從李長史遊開道林故山

幽尋極幽壑，春望陟春臺。雲光棲斷樹，靈影入仙杯。古藤依格上，野徑約山隈。落葉翻風去，流鶯滿樹來。興闌荀御動，歸路起浮埃。

和王記室從趙王春日遊陀山寺

烏旛陪訪道，鷲嶺狎棲真。四禪明淨業，三空廣勝因。祥河疎疊澗，慧日皎重輪。葉暗龍宮密，花明鹿苑春。雕談答奧旨，妙辯漱玄津。雅曲終難和，徒自奏巴人。

冬日野望

故人無與晤，安步陟山椒。野靜連雲捲，川明斷霧銷。靈巖聞曉籟，洞浦漲秋潮。三江歸望斷，千里故鄉遙。勞歌徒自奏，客魂誰爲招。

夕次舊吳

維舟背楚服，振策下吳畿。盛德弘三讓，雄圖枕九圍。黃池通霸迹，赤壁暢戎威。文物俄遷謝，英靈有盛衰。行歎鴟夷沒，遽惜湛盧飛。地古烟塵暗，年深館宇稀。山川四望是，人事一朝非。懸劍空留信，亡珠尙識機。鄭風遙可託，關月眇難依。西北雲逾滯，東南氣轉微。徒懷伯通隱，多謝買臣歸。唯有荒臺露，薄暮濕征衣。

過故宋

舊國千年盡，荒城四望通。雲浮非隱帝，日舉類遊童。綺琴朝化洽，祥石夜論空。馬去遙奔鄭，蛇分近帶豐。

池文斂東水，竹影漏寒叢。園兔承行月，川禽避斷風。故宋誠難定，從梁事未工。唯當過周客，獨愧吳臺空。

秋日山行簡梁大官

乘馬陟層阜，迴首睇山川。攢峯銜宿霧，疊嶺架寒烟。百重含翠色，一道落飛泉。香吹分巖桂，鮮雲抱石蓮。地偏心易遠，致默體逾玄。得性寧遊刃，忘言已棄筌。彈冠勞巧拙，結綬倦牽纏。不如從四皓，丘中鳴一絃。

晚泊江鎮

四運移陰律，三翼泛陽侯。荷香銷晚夏，菊氣入新秋。夜烏喧粉堞，宿鴈下蘆洲。海霧籠邊徼，江風繞戍樓。轉蓬驚別渚，徙橘泊離憂。魂飛瀟岸，淚盡洞庭流。振影希陵逸，名謝蟻丘。還嗟帝鄉遠，空翠白雲浮。

晚渡黃河

千里尋歸路，一葦亂平原。通波連馬頰，迸水急龍門。照日榮光淨，驚風瑞浪翻。棹唱臨風斷，樵謳入聽喧。岸迴秋霞落，潭深夕霧繁。誰堪逝川上，日暮不歸魂。

晚憩田家

轉蓬勞遠役，披薜下田家。山形類九折，水勢急三巴。懸梁接斷岸，澀路擁崩查。霧巖淪曉魄，風溆漲寒沙。心迹一朝舛，關山萬里賒。龍章徒表越，閩俗本殊華。旅行悲泛梗，離贈折疎麻。唯有寒潭菊，獨似故園花。

宿山莊

金陵一超忽，玉燭幾還周。露積吳臺草，風入郢門楸。林虛宿斷霧，磴險掛懸流。拾青非漢策，化緇類秦裘。牽迹猶多蹇，勞生未寡尤。獨此他鄉夢，空山明月秋。

夏日夜憶張二

伏枕憂思深，擁膝獨長吟。烹鯉無尺素，斲魚勞寸心。疎麻空有折，芳桂湛無斟。廣庭含夕氣，閑宇澹虛陰。織蟲垂夜砌，驚鳥棲暝林。驩娛百年促，羈病一生侵。詎堪孤月夜，流水入鳴琴。

寓居洛濱對雪憶謝二

旅思眇難裁，衝飈恨易哀。曠望洛川晚，飄飄瑞雪來。積彩明書幌，流韻繞琴臺。色奪迎仙羽，花避犯霜梅。謝庭賓方逸，袁扉掩未開。高人儻有訪，興盡詎須回。

敘寄員半千

薄宦三河道，自負十餘年。不應驚若厲，祇爲直如弦。坐歷山川險，吁嗟陵谷遷。長吟空抱膝，短翮詎冲天。魂歸滄海上，望斷白雲前。釣名勞拾紫，隱迹自談玄。不學多能聖，徒思鴻寶仙。斯志良難已，此道豈徒然。嗟爲刀筆吏，恥從繩墨牽。歧路情雖狎，人倫地本偏。長揖謝時事，獨往訪林泉。寄言二三子，生死不來旋。

靈隱寺

鷲嶺巖峽，龍宮鎖寂寥。樓觀滄海日，門對浙江潮。桂子月中落，天香雲外飄。捫蘿登塔遠，剝木取泉遙。

霜薄花更發。冰輕葉互凋。夙齡尙遐異。搜對滌煩囂。待入天台路。看余度石橋。

寒夜獨坐遊子多懷簡知己

故鄉渺千里。離憂積萬端。鶉服長悲碎。蝸廬未卜安。富鈞徒有想。貧鋏爲誰彈。柳秋風葉脆。荷曉露文團。晚金叢岸菊。餘佩下幽蘭。伐木傷心易。維桑歸去難。獨有孤明月。時照客庭寒。

傷祝阿王明府并序

夫心之悲矣。非關春秋之氣。聲之哀也。豈移金石之音。何則。事感則萬緒興端。情應則百憂交軫。是以宣尼舊館。流襟動激楚之悲。孟嘗高臺。承睫下聞琴之淚。祝阿王明府。毓德丹穴。襲吉黃裳。靈基峙金闕之峯。層源瀨玉輪之坂。旣而鴻飛漸陸。將聘平輿之龍。鶴鳴在陰。爰絆朝歌之驥。乃當名懸闕月。德貫陳星。豈徒遽切夢瓊。掩沉連石。嗟乎。輪銷桂魄。驪珠毀貝闕之前。斗散紫氛。龍劍沒延平之水。某昔承嘉惠。曲荷恩光。留連嘯歌。從容風月。撫心陳迹。泣血漣如。然而始終者萬物之大歸。生死者百年之常分。雖則知理之可有。而未曉情之可無。聊綴悲歌。敢貽同好。諸君或締交三益。列宰一司。或叶契筌蹄。投心膠漆。如比肩於千里。遽傷魂於九原。旣切芝焚。彌深蕙歎。盡言四始。同賦七哀。庶蘭室流薰。襲遺芳而化德。故蓬心中拙。效庸音於起予。觸目多懷。周增流慟。

洛川真氣上。重泉惠政融。含章光後烈。繼武嗣前雄。與善良難驗。生涯忽易窮。翔鳧猶化履。狎雉尙馴童。

錢滿荒階綠，塵浮虛帳紅。夏餘將宿草，秋近未驚蓬。煙晦泉門閉，日盡夜臺空。誰堪孤隴外，獨聽白楊風。

詠懷

少年識事淺，不知交道難。一言芬若桂，四海臭如蘭。寶劍思存楚，金鎚許報韓。虛心徒有託，循迹諒無端。太息關山險，吁嗟歲月闌。忘機殊會俗，守拙異懷安。阮籍空長嘯，劉琨獨未懽。十步庭芳斂，三秋隴月圓。槐疎非盡意，松晚夜凌寒。悲調絃中急，窮愁醉裏寬。莫將流水引，空向俗人彈。

邊夜有懷

漢地行逾遠，燕山去不窮。城荒猶築怨，碣毀尙銘功。古戍煙塵滿，邊庭人事空。夜關明隴月，秋塞急胡風。倚伏良難定，榮枯豈易通。旅魂勞泛梗，離恨斷征蓬。蘇武封猶薄，崔駰宦不工。惟餘北叟意，欲寄南飛鴻。

久戍邊城有懷京邑

擾擾風塵地，遑遑名利途。盈虛一易舛，心迹兩難俱。弱齡小山志，寧期大丈夫。九微光賁玉，千仞忽彈珠。棘寺游三禮，蓬山筮八儒。懷鉛慚後進，投筆願前驅。北走非通趙，西之似化胡。錦車朝促候，刁斗夜傳呼。戰士青絲絡，將軍黃石符。連星入寶劍，半月上彫弧。拜井開疎勒，鳴桴動密須。戎機習短蔗，祆綬靜長榆。季月炎初盡，邊庭草早枯。層陰籠古木，窮色變寒蕪。海鶴聲嘹唳，城烏尾畢逋。葭繁秋色引，桂滿夕輪虛。行役風霜久，鄉園夢想孤。滿池遙夏國，秦海望陽紆。沙塞三千里，京城十二衢。楊溝連鳳闕，槐路擬鴻都。



璧殿規宸象，金隄法斗樞。雲浮西北蓋，月照東南隅。寶帳垂連理，銀牀轉轆轤。廣筵留上客，豐饌引中廚。漏緩金徒箭，嬌繁玉女壺。秋濤飛喻馬，春水泛仙鱸。意氣風雲合，言忘道術趨。共矜名已泰，詎肯沫相濡。有志慙雕朽，無庸類散樗。關山暫超忽，形影歎艱虞。結網空知羨，圖榮豈自評。忘情同塞馬，比德類宛駒。隴阪肝腸絕，陽關亭堠迂。迷魂驚落鴈，離恨斷飛鳧。春去榮華盡，年來歲月無。邊愁傷郢調，鄉思繞吳歎。河氣通中國，山途限外區。相思若可寄，冰泮有銜蘆。

幽禁書情通簡知己

昔歲逢楊意，觀光貴楚材。穴疑丹鳳起，場似白駒來。一命淪驕餌，三緘慎禍胎。不言勞倚伏，忽此遣邈回。聽馬刑章峻，蒼鷹獄吏猜。爭縑非易辨，疑璧果難裁。揆畫慙周道，端憂滯夏臺。生涯一滅裂，歧路幾徘徊。青陸春芳動，黃沙旅思催。圓扉長寂寂，疎網尚恢恢。入窞先搖尾，迷津正曝顛。覆盆徒望日，蝓戶未驚雷。霜歇蘭猶敗，風多木屢摧。地幽蠶室閉，門靜雀羅開。自憫秦冤痛，誰憐楚奏哀。漢陽窮鳥客，梁甫臥龍才。有氣還衝斗，無時會鑿坏。莫言韓長孺，長作不然灰。

棹歌行

寫月塗黃罷，凌波拾翠通。鏡花搖芰日，衣麝入荷風。葉密舟難蕩，蓮疎浦易空。鳳媒羞自託，鴛翼恨難窮。秋帳燈華翠，倡樓粉色紅。相思無別曲，併在棹歌中。

五言絕句

在軍登城樓

城上風威冷，江中水氣寒。戎衣何日定，歌舞入長安。

臨易水送人

此地別燕丹，壯士髮衝冠。昔時人已沒，今日水猶寒。

送別

寒更承夜永，涼夕向秋澄。離心何以贈，自有玉壺冰。

詠照鏡

寫月無芳桂，照日有花菱。不持光謝水，翻將影學冰。

挑燈杖

稟質非貪熱，焦心豈憚熬。終知不自潤，何處用脂膏。

詠塵

凌波起羅襪，含風染素衣。別有知音調，聞歌應自飛。

翫初月

忌滿光先缺，乘昏影暫流。既能明似鏡，何用曲如鉤。

七言絕句

憶蜀地佳人

東西吳蜀關山遠，魚來鴈去兩難聞。莫怪常有千行淚，只爲陽臺一片雲。

雜言

詠鵝時年七歲

鵝鵝曲項向天歌，白毛浮綠水，紅掌撥清波。

駱丞集辨譌考異卷上

郡後學胡鳳丹月樵甫纂輯

卷一

螢火賦

小智非周身之務。

智一作知。

綈袍非舊。

非一作匪。

應節不慙。

慙一作慙。與慙同。

伊元功之播氣。

元一作玄。

資變

化而含養。

含一作涵。

似明星之出漢。

星一作珠。

的礫兮像招搖之夕爛。

的礫一作灼礫。

然重陰於已昏。

昏字恐晏字之誤。按各本

皆昏字。

對飛蛾之赴燭。

燭一作燭。

候昏明以進退。

以一作而。

不貪熱而苟進。

而一作以。

終徇己以效能。

效一作致。

道固從之於同類。

從一作求。

庸詎識其旨意。

旨一作指。

蕩子從軍賦

關塞元雲本自多。

元一作寒。

戎衣犯霜霰。

戎一作寒。

鳥無事而恆啼。

事一作情。

鸚鵡杯中休勸酒。

休一作寧。

箇日

新粧始復罷。

始一作如。

靈泉頌

篤行以通神爲本。

神一作仁。

戶部員外順之長子。

順一作順。

伶丁偏露。

伶一作幼。

苟立身其若斯。

苟一作敬。

遠近

川原

遠·一作環

殆將堙絕

堙·一作埋

忽有清泉自生

一作忽清泉

爰自興建以來

以·一作已

久微穿汲之利

久·一作暫

熱能治冥以通幽

治·一作治

道合則金蘭若膠漆

合·一作義

道洽斯親

道·一作通

卷二

夏日遊德州贈高四

因仰長安而就日

因·一作固

雖交因氣合

氣·一作契

則紫耀連星

紫·一作甘

〔按〕

〔按〕

白雪梁山曲

雪·一作雲

羅悲翟公意

悲·一作起

鳥聲流向薄

向·一作迴

柳陰低繫水

繫·一作壘

一瓢欣狎道

道·一作通

在江南贈宋五之問

潯陽九派長

潯陽·一作陽侯

淪波通地穴

淪·一作輪

輸委下歸塘

輸·一作委

連洲擁夕漲

漲·一作陽

韞珠澄積潤

澄·一作成

劍閣連星起

閣·一作匣

揆拙迷三省

省·一作畫

〔按〕

〔按〕

勞生昧兩忘

昧·一作暗

彈隨空被笑

隨·一作冠

千里易炎涼

易·一作暴

川陸疲臻湊

川·一作水

邯鄲通北走

北走平生親

走·一作走

字·一本

南浦別離津

別·一作則

采之將何遺

采·一作采

爲聽短歌行

聽·一作想

當想長洲苑

想·一作憶

露金熏

菊岸

菊·一作芻

晚秋雲日明

晚·一作秋

亭臯風霧清

霧·一作露

重牽搖落情

重·一作空

郢路少知音

知·一作音

猶輕

五車富

猶輕·一作由來

李仙非易託

非·一作悲

蘇鬼尙難因

尙·一作曲

詠懷古意上裴侍御

三十二餘罷。作二。一窮經不常用。窮經。一弓開漢月輪。弓開。一金刀動秋色。刀。一

### 帝京篇

桂殿嶽岑對玉樓。嶽。一作陰。三條九陌麗城隈。麗。一作鳳。銅羽應風回。羽。一朱邸抗平臺。抗。一作

金饌玉待鳴鐘。炊。一作灼。一繡柱璇題粉壁映。繡。一作綺。陳遵投轄正留賓。正。一作尚。一青牛紺轡紅塵度。

牛。一倡家桃李自芳菲。芳。一作芬。一京華遊俠盛輕肥。盛。一作事。一延年女弟雙鳳入。鳳。一作飛。一且論三萬六千

是。三萬六千。一作二八千金。古來榮利若浮雲。榮。一作名。一始見田竇相移奪。一作相。春去春來苦自馳。至空埽相門誰

見知。紀事無此四句。當時一旦擅豪華。當時。一作莫矜。一黃雀徒巢桂。雀。一作柱。一誰惜長沙傅。傅。一作

### 疇昔篇

遨遊灞水曲。水。一作陵。一掩映飛軒乘落照。落。一作夜。一參差步障引朝霞。引。一作列。一池中舊水如懸鏡。如。一作繞

歲月春秋屢迴薄。歲月春秋。一作歲去年來。一中國幾見梅花落。見。一作番。疇昔交朋已疎索。朋。一作遊。一莫教憔悴

損容儀。莫。一作不。一會得高秋雲霧廓。得。一作在。一無事積炎涼。積。一作度。一六載奉長廊。長。一作賦。一執戟歎前揚。

歎。一潘陸詞鋒駱驛飛。駱驛。一作絡繹。一張曹翰苑縱橫起。張曹翰。一作張文。一垂釣甘成白首翁。負薪何處逢知己。

一作徒勞倦負薪。何處逢知己。無垂釣甘成白首翁。七字。判將運命賦窮通。判。一作誰。一從來奇舛任西東。奇。一作命。一不應永棄同芻狗。不。一

容鬢年年異。容。一作客。一春華歲歲同。華。一作花。一脂車秣馬辭鄉國。鄉。一作京。一紫轡西南使叩焚。紫。一作策。一為

轉蟬吟有悲望。吟·一 劍閣連山千種色。種·一 迸淚連雙流。連·一 寒光千里暮。光·一 長途看東

馬。東·一 石鏡蛾眉真秀麗。真·一 四士英靈富文藝。富·一 墟高龜望出。墟·一 帝里沈沈

限城闕。沈沈限·一 故園梅柳尚餘春。有餘·一 來時勿使芳菲歇。來時·一 解鞅欲言歸。鞅·一 離念

惜徂暉。徂·一 知音何所託。木落鴈南飛。木落有南飛·一 回來望平陸。春來酒應熟。望·一 離念

將菌閣臥青溪。菌閣·一 謝曉詩。尋雲陟累樹。隨山望菌閣。臥。一作望·一 溪。一作沂·一 且用藤杯泛黃菊。林·一 按。

十年不調爲貧賤。調·一 使我再干州縣祿。使·一 使我再干州縣祿。使·一 使我再干州縣祿。

百年鬱鬱少騰遷。遷·一 萬里遙遙入鏡川。遙遙·一 淡江拂潮衝白日。淡·一 使我再干州縣祿。

長波接遠天。接·一 常伴客旌懸。常伴·一 塗山執玉應昌期。期·一 共踏春江曲。共·一 俱唱采菱歌。

風光無限極。極·一 芝田花月屢裴回。月·一 金谷佳期重游衍。佳期·一 登高北望嗤梁叟。

分沒九泉深。沒·一 茹荼空有歎。空·一 賓階客院常疎散。客·一 旭旦含顰不成笑。成·一

復道郎官稟綸誥。誥·一 高門有闕不圖封。闕·一 吹毛未可待。未·一 丈夫坎壈多愁疾。愁·一 鄒衍銜悲繫

從御史彈。史·一 炎威資夏景。資·一 吹毛未可待。未·一 丈夫坎壈多愁疾。愁·一 鄒衍銜悲繫

李斯抱怨拘秦桎。桎·一 朱門不易排。易·一 雪杜途無階。杜途·一 涸鱗去轍還遊海。

幽禽釋網便翔空。便·一 誰能跼蹐依三輔。跼蹐·一

行軍軍中行路難

金壇受律動將軍。受。一作授。一作勳。戰士橫行靜夷落。行戈。一作絕壁千里險。川原繞毒霧。繞。一作漂。

梗飛蓬不自安。自。一作暫。捫藤引葛度危巒。度。一作且悅清筓楊柳曲。楊。一作楊。按。李自詩。箭奏。花曲。

王褒詩。塗歌楊柳曲。卷欲樹花樽。絳節紅旗分白羽。白。一作日。行路難。一本下有行路。難。歧路字。空餘望日想長安。一本。無空餘二字。此篇。一本作辛。

常伯詩。

行路難

將軍受賑事橫行。賑。一作服。按。左傳。帥師者受命於廟。受賑于社。有常服矣。陳子良詩。天子命薄伐。受賑事專征。千里羅鼓疊。一作千重。行路難行。

路難。一本。無。詎隨中婦鳳樓寒。詎。一作頰。

艷情代郭氏答盧照鄰

迢迢芊路望芝田。芊。一作莘。作莘。渺渺南關恨蜀川。恨。一作限。一貨酒成都妾亦然。貨。一作賣。一思君欲上望夫臺。上。一作。

坐。側耳空房聽曉雞。曉。一作曉。

代女道士王靈妃贈道士李榮

臺前鏡影伴仙娥。影。一作裏。雙童綽約時游陟。童。一作。乍可憇憇共百年。憇。一作忽忽。一不把丹心比玄石。

把。一作投。何悟春來春更思。悟。一作悞。一俠客妖容遞來往。俠。一作侯。按。李白少年行。君不見淮南少年游俠客。白日繡獵夜擁。寶騎連花鐵作。



錢連車・一龍颺去去無消息連車・一

颺颺・一作駭颺・【按】字典無此駭字

不分淹留桑路待

桑乘・一

駱丞集辨僞考異卷下

卷三

在獄詠蟬序

而聽訟斯在。一本·缺聞螻蛄之流聲。流有·一

渡瓜步江

鳴榔下貴洲。貴·一月迴寒沙淨。寒·一他鄉空滯留。空·一作容·一

途中有懷

涸鱗驚照轍。照·一

望鄉夕泛

歸懷剩不安。剩·一

白雲抱幽石。一本·有賦

飄蓬雨蓋分。蓬·一作蓮·〔按〕杜甫贈李

春雲處處生。一本·有賦

槩日祥光舉槩一作暫

又一作暫

同辛簿簡仰酬思玄上人林泉四首其一

緝芟知還楚芟一作艾

其四

長似寄相思似一作以

秋日送陳文林陸道士一作陸道士陳文林

赤馬走吳宮馬一作鳥

送費六還蜀

月峽指吳門峽一作破還愁三徑晚愁一作當

秋夜送闔五一作秋夜送闔五還澧州

素風啼迴蝶啼一作蝶帶聲分迴蝶當日辨翻潮

送王明府上京參選一作送王明府參選賦得

孤影尙淩烟淩一作陵別操繞繁弦操一作引

在兗州餞宋五之問

淮沂泗水地沂一作尼

遊靈公觀

靈峯標勝境峯一作岑 玉殿斜連漢連一作臨 流水切危絃危一作寒

夏日游山家同夏少府

蘭徑薰幽珮珮一作佩

初秋登王司馬樓宴一本脫王字

登龍喜宴同喜一作嘉

初秋於寶六郎宅宴一本作初秋於六宅宴

意盡深交合一作深交洽 草帶銷寒翠帶一作砌 花枝發夜紅枝發一作紅

冬日宴

促席鸞觴滿席一作膝

詠雲酒

色泛臨碣瑞碣一作甲

詠美人在天津橋

容與上天津。上·一  
作·一動衣香滿路。動·一  
作·一

送郭少府

開筵枕德水。枕·一  
作·一

冬日過故人任處士書齋

獨此琴臺夜。夜·一  
作·一

秋風

紫陌炎氛歇。氛·一  
作·一

秋雲

泛斗瑤光動。瑤·一  
作·一

秋露

金塘秋色歸。色·一  
作·一添荷滴尚微。荷·一  
作·一

秋月

月滿鏡輪圓。月·一  
作·一桂露珠暉冷。珠·一  
作·一凌霜桂影寒。桂·一  
作·一

秋水

金闕寒流徹金·一  
作貝·一

秋菊

碎影涵流動涵·一  
作隨·一

詠水

映柳似沈鱗似若·一  
作若·一

詠鴈

唼藻滄江遠滄江·一  
作蒼梧·一霧深迷曉景曉·一  
作曉·一

詠雪

龍雲玉葉上玉·一  
作收風·一作收風〔按〕梁元帝對燭賦：「覆玉葉之繡雲。」照扶桑初映空·雲如玉葉  
之初日·含輝明素篆明·一  
作明·一隱迹表祥輪明·一  
作明·一

表·一  
作奉·一

王昭君一作昭  
君怨·一

古鏡菱花暗古·一  
作妝·一

樂大夫挽詞四首其一

荒涼井徑寒徑·一  
作隱·一

其三

昔去梅笳發笳一作花

其四

松風向暮哀向一作起

丹陽刺史挽詞三首其一

一旦向山阿向一作附 丹桂銷已盡已一作亡 青松哀更多更一作思

其三

寒隧積成茔隧一作隊

送劉少府遊越州

露下蟬聲斷露下一作背夏 寒來雁影連寒來一作來寒 悽斷聽離弦離一作繁

從軍行

平生一顧重重一作念 惟當死報君當一作留

出石門

藤細弱絲懸絲一作鈎

至分陝

召南分沃疇

召部·一  
作邵·一  
憇棠疑勿翦·  
勿忽·一

春夜韋明府宅宴

雅琴馴魯雉

魯·一  
作野·一  
清歌落范塵·  
范梁·一

聊當故鄉春

春·一  
一作人〔按〕人與  
第一聯商人同韻·

卷四

浮槎

故材用與不用時也

一本·缺材  
用之用字·擁腫遂無庸·  
擁腫·一

春霽早行

一作春日離長  
安客中懷·

談器非先木

一作先  
蠟木·烏裘幾滯秦·  
秦·一

晚度天山有懷京邑

坐憐衣帶賒

憐·一  
作令·

晚泊河曲

浦荷疎晚的

的·一作藹·〔按〕的  
與藹通·蓮中子也·仙槎不可託·  
槎·一

遠使海曲春夜多懷



低月似依營。低·一  
作明·一時迹自相驚。時·一  
作味·一

過張平子墓

南陽擅德音。陽·一  
作州·一日落豐碑暗。一作日往  
豐碑閣·

蓬萊鎮

野樓疑海氣。疑·一  
作凝·一

宿溫城望軍營

兵符關帝闕。關·一  
作闕·一塞靜胡笳徹。塞·一  
作戍·一

和孫長史秋日臥病

霍第疎天府。第·一  
作地·一

四月八日題七級

因茲遊勝侶。因·一  
作昔·一曲音號蓋煙。一本缺  
音字·

早秋出塞寄東臺詳政學士

戎雲聚塞垣。戎·一  
作胡·一戍古秋塵合。合·一  
作冷·一蘭渚浮延閣。一作瀛島  
延閣·南圖終鍛翮。鍛·一  
作斂·一

鄭安陽入蜀。一作錢鄭安  
陽入蜀·

彭山折坂外。山門。一 畏途君悵望。畏長。一 歧路我徘徊。歧別。一

在軍中贈先還知己

論封幾謝班。封功。一

望月有所思

九秋涼風肅。風氣。一 晚色依關近。晚曉。一

送吳七遊蜀

星橋接蜀門。接抵。一 夏老蘭猶茂。老盡。一 秋深柳尚繁。深新。一

西行別東臺詳政學士

客似秦川上。似自。一 歌疑易水濱。疑從。一 臺遠尙名輪。輪一作輪。〔按〕岑參輪臺歌。〔輪臺城頭夜吹角。輪臺城北旄頭落。〕

和王記室從趙王春日遊陀山寺

鷲嶺狎棲真。狎洽。一 慧日皎重輪。慧惠。一

冬日野望

三江歸望斷。望斷。一 作步杏。

夕次舊吳

維舟背楚服。

背一作皆。

雄圖枕九圍。

枕一作抗。

黃池通霸迹。

迹一作業。

關月眇難依。

眇一作眇。

惟有荒臺露。

露一作路。

過故宋

川禽避斷風。

禽一作鴉。

晚泊江鎮

轉蓬驚別渚。

別渚一作鵝。

徙橋愴離憂。

一本無此四句。今依全唐詩集中補入。

晚渡黃河

一葦亂平原。

亂一作辭。

照日榮光淨。

淨一作渾。

日暮不歸魂。

不歸一作他鄉。

晚憩田家

水勢急三巴。

水一作江。

閩俗本殊華。

殊一作非。

旅行悲泛梗。

悲一作勞。

離贈折疎麻。

折一作斷。

宿山莊

化緇類秦裘。

化緇一作緇。

夏日夜憶張二

驚鳥棲暝林。

鳥一作鳥。

寓居洛濱對雪憶謝二

一作洛濱對雪憶謝二兄弟。

衝颺恨易哀。

恨·一作限·

積彩明書幌。

幌·一作帳·

〔按〕北戶錄·梁簡文帝嘗徐攜書曰·特設書

帳·乍置筆牀·孟浩然詩·書幌神仙籙·畫屏山海圖·

流韻繞琴臺·

槐·一作響·

花避犯霜梅。

霜·一作露·

寒夜獨坐遊子多懷簡知己。

荷曉露文團。

曉·一作晚·

維桑歸去難。

桑·一作乘·

〔按〕詩·維桑與梓·必恭敬止·

〔陸雲歲暮詞·〕歲孝敬於神丘兮·結紙墓於維桑·

傷佩阿王明府。

含章光後烈。

烈·一作列·

與善良難驗。

與善·一作契與·

翔鳧猶化履。

化·一作在·

煙晦泉門閉。

閉·一作夕·

日盡夜臺空。

臺·一作遠·

邊夜有懷。

崔駟宦不工。

宦·一作官·

久戍邊城有懷京邑。

葭繁秋色引。

引·一作秋·

桂滿夕輪虛。

虛·一作孤·

鄉園夢想孤。

孤·一作殊·

銀牀轉轆轤。

轆·一作鹿·

關山暫超忽。

關·一作闕·

形影歎艱虞。

影·一作倦·

陽關亭墩迂。

墩·一作隴·

年來歲月無。

無·一作蕪·

〔按〕蕪·與前寒蕪同韻·今依無字·

幽熱書情通簡知己。

昔歲逢楊意。

歷·一作陽·

觀光貴楚材。

貴·一作賈·

一命淪驕餌。

驕·一作驕·

〔按〕任昉到大司馬·記

揆畫慙周道·

揆畫·一作揆·

青陸春芳動。

春芳·一作芳春·

人穿先搖尾。

先·一作方·

棹歌行

寫月塗黃罷。塗·一  
作圖·一葉密舟難蕩。密·一  
作露·一秋帳燈華翠。秋·一  
作愁·一  
燈·一

在軍登城樓

城上風威冷。冷·一  
作險·一

臨易水送人

壯士髮衝冠。一作壯髮  
上衝冠·一

詠照鏡

照日有花菱。日·一  
作面·一

既初月

忌滿光先缺。先·一  
作恆·一既能明似鏡。既自·一  
作自·一

詠鵝

曲項向天歌。曲項·一  
作仰面·一

編主五雲王

編初成集書叢

集 丞 駱

異攷譌辨附

中華民國二十六年六月初版

撰 者 駱 賓 王

發 行 人 王 雲 五  
上海河南路

印 刷 所 商 務 印 書 館  
上海河南路

發 行 所 商 務 印 書 館  
上海及各埠

中 E 五二四四

張

(本書校對者謝增綬)

